

Э. И. ПОЛЯКОВА, Т. И. ПРОКУШЕВА

# КОМИ КЫВ

НЁЛЬӨД КЛАССЛЫ ВЕЛӨДЧАН НЕБӨГ



Вынсьөдіс Коми Республикаса  
йөзөс велөдан министерство

АНБУА

Сыктывкар  
2010

ББК 81.2 Коми  
П 54

Велодчан небөгсö дасьтöма Коми Республикаса образование  
сöвмöдан да кадръяс дасьтан институтын

Велодчан небөгсö серпасалисны **Г.Н. Шарипков, И.А. Авилова**

### ОТСАСЯН ПАСЪЯС:



– урок тема



– мый тöдмалам да мыйö велалам



– кывлөн гусяторъяс



– босьт тöд вылö гижанногсö



– кывлөн вежöртас



– гортса удж



– вöч тадзи



– проектнöй удж



– ёрта-ёрткöд уджалöм



① – видлавны кывсö шы да шыпас серти

② – видлавны кывсö тэчас серти

③ – видлавны кывсö кывсикас серти

④ – видлавны сёрникузясö юкöдъяс да тэчас серти

© Полякова Э. И., 2010

© Прокушева Т. И., 2010

© Шарипков Г. Н., оформление, 2010

© Авилова И. А., оформление, 2010

© ООО «Анбур», 2010

ISBN 978-5-91669-029-3



1 удж. Лыдды кывбурсö.

Авъя лэбач – коми кыв,  
Коми сёрни, сьыланкыв.  
Быдмин-сöвмин, сьöлөмшөрöй,  
Коми йöзкөд парма шöрын.

Мича дзоридз – коми кыв,  
Чужанінлөн муса ныв.  
Уна нэм тэ олан-вылан,  
Ылөдз нималан да кылан.

*А.Некрасов (Гамса)*

◆ Мыйла гижысьыс коми кывсö шуö «авъя лэбачöн» да «дзоридзöн»?

◆ Кызди гөгөрвоан: «Ылөдз нималан да кылан»?

2 удж. Кызди тэ донъялан ассьыд чужан кыв-тö? Лöсьöд 2–3 сёрникузя чужан кывлөн коланлун йылысь.

## СЁРНИКУЗЯ, СЁРНИ ДА ТЕКСТ



### Сёрникузя сикасьяс.

? Кутшөм сёрникузя сикасьяс паныдасьлөны сёрниын?



3 удж. Видзөдлы серпассö да тöдмась. Лөсьöд серпас



серти морта-морт сёрни.




4 удж. Лыдды гижöдсö. Инды сёрникузяяс да гиж найöс. Пукты колана пасьяс. Помав 2–3 сёрникузяөн.

Кутшөм гажа тайö арся луныс школа дорын уна йöз гожся каникул бöрын велöдчысьяс аддзисисны ёрта-ёртныскöд триньöбтис гора тильгун да чуксалис челядьöс классö




5 удж. Висьтав таблица сертиг сёрникузя сикасьяс йылысь.

**Висьталан мог серти сёрникузяяс овлоны:**

 <b>Юёртана</b>	<b>Юалана</b>	<b>Чуксалана</b>
<p>Сёрнитысьыс мыйкё йылысь висьталё, юёртё.</p>	<p>Сёрнитысьыс мыйкё юалё.</p>	<p>Сёрнитысьыс тшөктё мыйкё вöчны, мыйыськё öлөдö.</p>
<p>Сёрникузя помын сувтöдöны чут да горöдан пас.</p>	<p>Сёрникузя помын сувтöдöны юалан пас.</p>	<p>Сёрникузя помын сувтöдöны чут либö горöдан пас.</p>
<p><i>Велöдчысьяс тэр-масьöны школаö.</i></p>	<p><i>Кыдзи тi шойччинныд гожöмнас?</i></p>	<p><i>Челядь, видзöй ассьыныд бур нимтö, лöй шудаöн.</i></p>

**Шуанног серти сёрникузяяс овлоны:**

 <b>Горöдана</b>	<b>Абу горöдана</b>
<p>Сёрнитысьыс юёртö ассьыс сёлöмкылöмсö петкöдлöмөн.</p>	<p>Сёрнитысьыс юёртö сёлöмкылöмсö петкöдлытöг.</p>
<p>Сёрникузя помас колö пуктыны горöдан пас (!).</p>	<p>Сёрникузя помас гөлöстö колö чинтыны, лөньюдны. Сёрникузя помас колö пуктыны чут (.)</p>
<p><i>Тöдöмлун нимöдан лунöн тiянöс, менам дона Челядь!</i></p>	<p><i>Школа дорыс тыр йöзнас. Быдöн вежавидзöмөн чолöмасьöны.</i></p>

◆ Мый тöдан сёрникузя йылысь? Мый öткодыс сёрникузя велöдöмын роч да коми кывйын?

6 удж. Висьтав, кыдзи тэ коллялін гожом.



7 удж. Лосьод кывъяссыс сёрникузяс да гиж. Сёрникузяс помё пуктав колана пасъяс.

ар, долыд, быдөнлы, медводдза, луно  
шкалао, Ваня, мунё, таво  
козьналіс, велёдыссыслы, дзоридзьяс, сійо  
чолёмалис, Анна Петровна, тёдмлун нимодан лунён,  
Ваняос  
зэв, детинкалы, нимкодъ, лои



**Текст. Паськыд да векныд тема.**

Кутшом гижод шусьо текстон?

?

Мый сійо тема?

Кутшом тема лоо паськыдон? А кутшом векныдон?

Мыйон торъялоны паськыд да векныд тема?



**8 удж.** Лыдды гижөдъяссө да орччөд.

### **Гожом – гажа кад.**

Со и пуксис волон медся гажа кад – гожом. Тайо кад-нас шонди мыччө ассыс нюмъялан бансө да ыстө ассыс югоръяссө чужан мулон быд пельөсө. Сылысь петөмсө медводз казялоны лэбачьяс. Найо заводитоны мичаа сывны да асланыс кыв вылын варовитны.

### **Ю дорын.**

Шонди жар луно радлоны челядь<sup>①</sup>. Найо гажаа бузөдчоны ваын, ризъялоны ю полон. Зонпосни гожйөдчоны паччор кодь пось лыа вылын.

◆ Инды текстъяслысь темасө. Кодар текстыслон темаыс паськыд?

◆ Серпас сертиыс содты некымын сёрникузя.

**9 удж.** Лыдды. Висьтав, позьө-ө гижөдсө шуны текстөн.

Гожом пуксигон муыс и ваыс гөгөрбок ловзьө. Муяс да эрдьяс вылын лымйыс модис сывны. Мичаа вежөдысь увтас местаясын, джуджыд да паськыд сёнъясын бияс моз ыпнитисны-өзйисны купальничаяслон зарни юрьясныс. Пуяслон корьясыс вижөдисны да заводитисны гылавны. Войбыд сапкис-усис небыд лым. Кудриа юрсиа льом пу динысь өвтис чөскыд көрөн.

◆ Бөрйы «Гожом» тема серти сёрникузяяс, мед артмис текст да гиж.

**10 удж.** Лөсьөд кивъясьыс сёрникузяяс да артмөд висът. Юрнимав текстсө.

пөжис, талун, асывсяньыс  
паськалісны, кымөръяс, пыр водзö и водзö, еджыд,  
луннас

кымөръяс, сэсса, юра, мыччысисны  
вевтгисны, енэж, найö, джынсö  
көнкö, муркнитіс, друг  
нетшыштгис, кыськö, төв ныр  
юковтіс, лөзов<sup>②</sup> биа, енэжсö, чард

*А.Лыуров серти*

- ◆ Паськыд али векньыд тема восьтö текстыс?
- ◆ Гөгөрвоод, мыйöн торъялöны сёрникузя да текст.
- ◆ Медбөръя сёрникузясö видлав юкөдъяс серти.

**11 удж.** Лыдды юрнимъяс. Инды паськыд да век-  
ньыд тема.

Гожём. Турун пуктан кад. Шондіа гажа гожся лун.  
Гымалігөн. Гожся зэр. Видз выв мич.

- ◆ Мыйöн торъялöны паськыд да векньыд темаяс?



**12 удж.** Юклы гижөдсö сёрникузяяс вылö да гиж ко-  
лана шыпасъяс содталөмөн.

Пыдөстөм лöz ен...жын дзирдал...с яръюгыд шонді  
друг мыччысис с...өд кымөр ывлаыс пемдіс мис...төм  
кымөр дзоньнас тупкис енэжсö войтышт...с некымын зэр  
войт н...дыр мысти шливöбтіс зэр



## Текст сикасьяс.



Кутшөм текст шусьö юөртана, серпаса да мөвпалана?

Текст сикасьяс		
текст-юөртөм	текст-серпас	текст-мөвпалөм
<i>мый вөчис?</i>	<i>кутшөм?</i>	<i>мыйла?</i>

13 удж. Лыдды текстсö да инды сикассö.

### Гожся вöрын.

Сөрнитигтыр батя-пия мунисны вөр туйөд. Жбыръя-лисны лэбачьяс. Ясыда кылис мыла көкөм: «Кук-ку! Кук-ку!»

– Кылан, батыö? Тайö көк көкө. А ме тöда: сьылөм сертиыс лэбачсö нимтöны көкөн,– ошйысис аслас тöдөм-лунөн пиыс.

Зонкалы окота лои матысяньджык кывзыштны лэбачыслысь көкөмсö.

– Батыö, гашкө, матын тасянь көкыдлөн позйыс? Вай видзöдлам!– нуөдчис пиыс.

– Ванюк, öдвакө сурас миянлы көкыдлөн позйыс. Сийö öд некор оз вöч позсö.

Батя-пия мөдöдчисны яглань<sup>3</sup>. Көклөн көкөмыс лөнис.

- ◆ Текст гөгөрвоөдөм могысь лөсьöд некымын юалөм.
- ◆ Кыдзи да мый серти рочьяс шуöны көкөс?
- ◆ Кутшөм нöшта лэбач нимъяс артмөмаөсь шы сетөм серти?

14 удж. Содтав лөсялана кывъяс да лыдды текстсö. Орччöд серпасыскöд.



### Кöк.

Миян пармаын олö кöк. Кöклөн мыш вылыс пöим рöма, зоб улыс еджгов, вомöныс пемыд визьяса. Бöжыс ..., кузьмöс сьöд серьяса, бöж помыс .... Син гөгöрыс ..., нырыс ... .



**Зоб** – лэбачлөн сюв юкөн. Комиён чуль. Сэтчö сёян-ыс чукöрмö да поснялö.

- ◆ Гиж текстсö.
- ◆ Тöдмав текст сикассö.

Отсöг кывъяс: *виж, еджыд, руд, сьöд.*

15 удж. Лыдды гижöдсö, инды текстыслыс сикассö да помав.

### Мыйла кöкöс шуöны мудер лэбачөн?

Кöкыд – зэв мудер лэбач. Мыйла сйöс шуöны мудер-өн?

Шуöны тадзи сы вöсна, мый кöклыс кöкписö мукöд лэбач пöжöны да лелькуйтöны. Кöкыд некор оз вöч аслыс позсö. Тулыснас мукöд лэбачлыс корсьö кольк тыра позсö. Сэся öти кольк жугöдö да йötкыштö-уськöдö. А сы пыдди пунктö ассыс кольксö. Со тадзи мукöд лэбач позйын и чужö кöкпиыд.

- ◆ Мыйла көкөс шуоны мудер лэбачён?
- ◆ Мый тэ верман содтөд висътавны позтөм көк йылысь?



**16 удж.** Комиөд текстсö да гиж.

На берёзе сидела кукушка. Вокруг неё между деревьями летали птицы. Они искали уютные жилища, таскали пушинки, мох, траву. Трудолюбивые птицы строили гнёзда. Только кукушка следила за птицами, не делала себе гнезда.



**Художествоа да наука гижөдъяс.**



Мыйөн торъялөны öта-мөдсьыс художествоа да наука гижөдъяс?

**17 удж.** Лыдды мичаа, сьөлөмсянь.

**Турияс.**

Турияс лэбöны,  
Шоныдсö нуöны.  
Гöгыльтчис гожöмыс  
Шоныдджык муö нин.  
Вой тöлыс шутьялö,  
Повзьöдлö, тэрмöдлö.  
Енэжын клуксöмыс  
Сьөлөмтö нормöдлö.

*А.Мишарина*



◆ Кызди гөгөрвоан: «Гөгыльтчис гожомыс шонид-джык муо нин»?

◆ Кутшом тайо гижодыс: художествоа либо наука?



**18 удж.** Лыдды кыкнан гижодсо да орчход. Мыйон найо торъялоны?

### **Тури.**

Тури – зэв ыджыд лэбач. Тушаыс ов-лывлө метрысь джуджыдджык. Кокыс кузь, божыс дженъыд, ичотик юрыс кузь ныра да кузь голя. Вывку гоныс чорыд. Турияслон кливксом шыыс зэв гора да кылө кык километр ылнасянь.

*А.Ракин серти*

### **Вежа пөткалон мыгөр.**

Ваньо видзодлис и паськыд керъяс вылысь пыр жө казялис кутшомкө лэбачос. Лэчыда вөлалөма стенас, кужысь киясон рисуйтома. Кузь голя вылын ёсь ныра не-ыджыд юр. Тушаыс помасьо пашкыр божон. Кузь кокъ-ясыс быттьо водзө воськовтоны.

Туриыд – мича да шань пөтка.

*И.Торопов серти*

8

**Художествоа** гижодө авторыс пыртө серпасалан да сёлөмкылөм петкөдлан кывъяс, вөдитчө мичкывъясөн, орчходомъясөн, петкөдланторсө ловзьодан да донъялан кывъясөн.

**Наука** текстын гижысьыс стөч кывъясөн висьталө, оз вөдитчы сёлөмкылөмсө петкөдлан да донъялан кывъясөн.

**19 удж.** Лыдды. Петкөдлы гөлөсөн сёрникузяяс шуанногсө.

Турияс лэбёны бара,  
Горзёмыс кылө зэв нор.  
Өшиньё зумыштчөм арыс  
Шыбитіс вижөдөм кор.

*С.Попов*

- ◆ Гиж кывбурсө юрвежысь.
- ◆ Орччөд кывбурсө урок темакөд.

**20 удж.** Лыдды да босыт төд вылө шусьөгъяс.

1. Ар бёрын гожөм оз пуксьывлы. 2. Арнад купеч кодьось, тулыснад корысь кодьось. 3. Арын и ракалөн быдса кольта.



**21 удж.** Лыдды текстсө да юрнимав. Содты колана кывъяс да сувтөд лөсялана вежлөг формаясө. Гиж содтөм кывъяса сёрникузяяссө.

Турияс кузь кокнас кокниа восьлалёны (*кыті?*) ... . Ветлөдлөны паськыда восьлалөмөн да тшапа. Арнас турияс лэбёны (*кытчө?*) ... . Найө кузя ливкйөдлөны да шывгёны йыла вожалан кельөбөн пыдөстөм (*кыті?*) ... . Вөрзьөдө сьөлөмтө вына (*кодъяслөн?*) ... чужан мукөд шогпырысь торйөдчөмыс. Видзөдан на бөрся и гөгөрвоан, мый матын нин көдзыдыслөн лов шыыс.

Тулыснас найө бөр воёны войвылө. Лолыд радлө, мый төв бёрын бара ставыс ловзьө.

Отсөг кывъяс: *нюр, лунвыв, енэж, лэбачьяс.*



## Текст-серпас.



Кызди торйөдны текст-серпас мукөд текстсы?

**22 удж.** Лыдды. Кутшөм юалөм лөсялө гижөдыслы: *мыйла? кутшөм? либө мый лоис?*

**Локтис ар.** Нора ышловзис вөр. Сьөлөм нормөд-мөн мича овлө вөр «баба гожөм» арся лунъясө. Гожөмкөд янсөдчыны вөрыс зарниөн да шөвкөн **пасьтасьлө.**

Праздник паськөмөн вөччөма вөр-пу. Гөрд кашемир дөрөма сулалө пипу. Виж китайка сарапана вашкөдчө кызд пу. Нора копыртыштөма пельсы пу би югыд **тугьяса** юрсө. Ылісянь тыдалө ниалөн зарни югыд кышөдыс. Чөлөсь сулалөны веж лыска козьяс да нывьяс.

*В. Чисталёв серти*



**Кашемир** – вурунысь вөсниа кыөм дөра.

**Китайка** – хлопокысь топыда кыөм дөра.

◆ Висьтав гижанногсө төдчөдөм кывьяслысь, инды орфограмма сикассө.

◆ Гиж текстсысь сьөлөм вылад воана сёрникузяяссө.

**23 удж.** Лыдды серпаса гижөдсө, содтав колана кывьяс.

### Зарни ар.

Сентябрь. Шонді көть абу нин гожся кодь ..., но ыв-лаын век на ... . Мыйта выльторсө позьё аддзыны арся лунъясө ... пармаысь! Восьлалан ... нитш вывтi, азыма ло-

лалан ... сынӧднас. Син водзад вежласьӧны ӧти бӧрся мӧд серпасъяс.

*И.Коданёв серти*

Отсӧг кывъяс: *небыдик, мелі, вӧрса, шоныд, паськыд.*

◆ Кутшӧм серпасъяс позьӧ аддзыны арся вӧрын? Помав серпаса гижӧдсӧ.

**24 удж.** Серпас да план серти лӧсьӧд да гиж нейджыд текст.

План:

1. Коми пармаӧ воис ар.
2. Зарни арлӧн мич: ю, кыдз пуяс, коз пуяс, поводдя, енӧж.
3. Кутшӧм сьӧлӧмкылӧм чужтӧ арся серпас?



# СЁРНИКУЗЯ



## Грамматика подув. Сюрёса да содтана юкөдъяс.

?

Мый сійө сюрёса да содтана юкөдъясыс?  
Кыдзи колө аддзыны содтана юкөдъяссө?  
Мыйла колёны содтана юкөдъясыс?



25 удж. Лыдды да висътав, мыйөн торъялөны сёрникузяясыс.

Ворсөдчис өшка-мөшка.	Енэж пасъталаыс уна рөмөн ворсөдчис шемөсмөдана өшкамөшка.
Дзирдаліс шонді.	Лөз енэжын дзирдаліс ярьюгыд шонді.

◆ Мыйөн торъялөны сёрникузяясыс воддза да мөд столбикас?

◆ Инды содтана юкөдъяссө. Кыдзи тэ найөс корсин? Мыйла найө колёны?

◆ Кывъясөн серпасав өшкамөшкасө.

26 удж. Лыдды гижөдсө.

### Рытъя өшкамөшка.

Зэрөм бөрын Ваня чөскыда унмовсис. Сэсса садьмис да петіс ывлаө<sup>2</sup>. **Енэжын гажаа пөртмасис мича өшкамөшка.** Öти помнас сійө мыджсьөма юө, а мөднас – кыдза раскө.

– Кутшөм вылын талун өшкамөшкаыс! Аски лоө мича лун, – эскөдіс внуксө бабыс. – Шуөны тай: рытъя өшкамөшкаыд мичаммөм водзын.

- ◆ Кыдзи пөчыс төдмаліс аскиа бур поводдя йылысь?
- ◆ Кутшөм гожся серпас усис төд вылад?
- ◆ Вайөд мича кывбердлы матын вежөртаса кывъяс.
- ◆ Гиж төдчөдөм сёрникузясө. Инды сюрөса да содтана юкөдъяс.



Подувпас да юөрпас сёрникузьяын артмөдөны **грамматика подув.** Найө петкөдлөны шөр мөвпсө.

27 удж. Лыдды колана ногөн.

### Өшкамөшка.

Медбөръя зэр тусьяс  
Сывъяс **боетьіс** шонді.  
Сэсса өшкамөшка  
Зіля дорны пондіс.

*А.Некрасов (Гамса)*

- ◆ Медводдза сёрникузьяысь инды грамматика подувсө.

◆ Висьтав тӧдчӧдӧм кывъяслысь гижанногсӧ, инды орфограммасӧ.

◆ Инды кывбурсьыс вуджӧдӧм вежӧртаса кывъяс.



28 удж. Паськӧд сёрникузяяссӧ содтана юкӧдъясӧн.

(*Кысянь?*) ... мыччысис (*кутшӧм?*) ... кымӧр. (*Кӧні?*)  
... шковӧбтіс ... (*кутшӧм?*) ... гым. Шливӧбтіс (*кутшӧм?*) ...  
зэр. (*Кысянь?*) ... (*кызди?*) ... тӧпкӧ (*кутшӧм?*) ... войтва.



### Кывтэчас да сёрникузя.



Мыйӧн торъялӧны кывтэчас да сёрникузя?  
Кызди колӧ торйӧдны сёрникузяысь кывтэчас?

29 удж. Лыдды кывтэчасъяссӧ, сэсся сёрникузяяс-  
сӧ. Висьтав, мыйӧн найӧ торъялӧны.

Кузь шатин. Ӧньӧ да Ивӧ мунісны вадорӧ. Зонкаяс  
чуймисны. Мудер Васька. Клянича доз. Талун мудер кань  
чӧсмасис ляпапаянӧн.



**Кывтэчас** – тайӧ ӧта-мӧдыскӧд йитчӧм кык  
асшӧр кыв. Кывтэчасъяс стӧчмӧдӧмӧн нимтӧны  
предмет, действие да признак: *мудер кань, радейта  
каньӧс, каньлы козин.*

Сёрникузяӧн ми юортам мый йылысь кӧ, вись-  
талам, юксям мӧвпъясӧн. Сёрникузяын эмӧсь **сю-  
рӧса кывъяс** – **подувпас** да **юӧрпас**. Подувпас да  
юӧрпас оз лоны кывтэчасӧн.





## Отсяма юкөдъяса сёрникузяс. Отсяма юкөдъяс костын **ДА, И** кывйитөдъяс.

Мый сійө отсяма юкөдъясыс?

?

Кутшөм юкөдъяс вермөны лоны отсямаөн?

Кыдзи сёрникузяын йитчөны ота-мөдыскөд отсяма юкөдъяс?

**34 удж.** Лыдды сёрникузяссө.

Менам баблөн керкаыс сулаліс сикт помас. Керка до-  
рас быдмисны **льөм** да **пелысь**. Пуяс **гажөдісны** и **мичмө-  
дісны** өшинь увсө.

- ◆ Кымын подувпас мөд сёрникузяс?
- ◆ Кымын юөрпас коймөд сёрникузяс?
- ◆ Кыдзи йитчөмаось төдчөдөм кывъясыс?
- ◆ Кыдзи шусьоны төдчөдөм кывъясыс?

быдмисны (*мый?*) → пелысь  
→ льөм

пуяс (*мый керисны?*) → гажөдісны  
→ мичмөдісны

8

**Отсяма юкөдъяс** йитчөны өти и сійө жө кывкөд, вочавидзөны өти и сійө жө юалөм вылө да лооны өти и сійө жө юкөдөн.

*Льөм, пелысь* – тайө отсяма подувпасьяс.

*Гажөдісны, мичмөдісны* – тайө отсяма юөрпасьяс.

Отсяма юкөдъяс йитчөны **да, и** кывйитөдъясөн, лыддьөдлан шуанногөн. **Да, и** водзын чүтіксө оз сувтөдны.

**35 удж.** Лыдды текстсö. Корсь öтсыма юкöдъяса сёрникузяссö да гиж.

### **Шемöсмöдана мича льöм пу.**

Öшинь улын сулалö кудриа юра ичмонь кодь льöм пу да ышнясьö мичнас. Шемöсмöдана мича тайö пуыс тудыснас! Дзоридзалан каднас пусьянь<sup>3</sup> öвтö чöскыд көрөн. Мича пу дорті мунігөн верстьö и челядь ньöжмöдлöны воськовсö.



◆ Висьтав, кызди йитчöмаöсь öтсыма юкöдъясыс.

**36 удж.** Лыдды сёрникузяссö да инды тырмытöмторсö.

1. Школа дорын быдмис пелысь. Школа дорын быдмис льöм пу. 2. Арнас пелысь пулөн гөрдöдöны тусьясыс. Пелысь пулөн öзйöны гөрд биөн тусьясыс.

◆ Лöсьöд кык сёрникузя:

1. Школа дорын быдмисны ... да ... .

2. Арнас пелысь пулөн тусьясыс ... да ... .

◆ Висьтав, мыйла колöны сёрниын öтсыма юкöдъяс.

?

Тöдан-ö тэ, мый льöм кыв эм уна финн-угор кывйын. Сідзкö, тайö кывсö мян пöль-пöч тöдлöмаöсь финн-угор подув кывйын на, квайт гөгөр сюрс во сайын.



**37 удж.** Гиж текстсö колана шыпасъяс содталöмөн, орфограммаяс индöмөн. Öтсяма юкöдъяссö вывсъянныс пасйы ö пасөн.



### Пелысь пу.

Керка дорын вужъясис да овмöдчис пелысь пу. Тайö пуыс пыр мича! Гожöмнас дзоридз...яс места-ас гөррдзас...öны тусъяс. Пелысь пу быдтö да кис...мöдö тус...яссö.

Арлан...ыс тусъясыс гөрдöдöны да öзйöны гөрд биөн. Сёр арын пелысьыс ставнас ыпъялö, быттö яръюгыд бипур. Ыл...сянь тыдалö тайö гөрд пуыс да кыскö ас дiнас.



### Öтсяма юкöдъяс костын чүтiк.



Кызди гижигөн торйöдöны öта-мöдсыйс öтсяма юкöдъяс?

Мыйла öтсяма юкöдъяс костö колö пуктыны чүтiк?

**38 удж.** Лыдды гижöдсö. Инды öтсяма юкöдъяс.

Коми мортыдлөн сьöлöмыс бурмö сöмын пармаын. Вöрысь мортыдлы шедö сёян, ломтас. Танi сийö тыр морсөн лолалö, апалö сöстöм сынöдсö. Вөрöд, ягöд подөн ветлигөн уна сикас серпас аддзылö. Ордым, вöрса прöсек, пес керас висьталöны морт да парма йитöд йылысь.

◆ Кызди гөгөрвоан: «*Вöрысь мортыдлы шедö сёян, ломтас*»?

- ◆ Кызди торйӧдны ӧта-мӧдсьыс ӧтсыа юкӧдъяс?
- ◆ Кызди йитчӧны ӧта-мӧдыскӧд ӧтсыа юкӧдъяс?

**Ордым** – вӧрын векныдик пода туй.



**Вӧрса прӧсек** – визирка, вӧрын мортӧн вӧчӧм туй.

**Пес керас** – пес кераланӧн.



Сӧрникузьян ӧтсыа юкӧдъяс вермӧны йитчыны кывйитӧдъястӧг, сӧмын шуанногӧн. Сӧки гижигӧн ӧтсыа юкӧдъяс торйӧдӧны чутӧкӧн.

**39 удж.** Гиж текстсы ӧтсыа юкӧдъяса сӧрникузьяссӧ. Схемаӧн петкӧдлы ӧтсыа юкӧдъяссӧ.

### **Войвывса пальма.**

Грезд помын уна во быдмис тшап, мича сус пу. Тайӧ пусӧ частӧ нартитлисны тӧв, бушков. Корсюрӧ сус пусӧ кӧтӧдліс, мыськавліс шоныд зӧр. Тшӧкыда сійӧс шонтыліс мелі шонді.

Сус пу тӧдліс йӧзыслыс шогсӧ, радлунсӧ. Праздникъяс дырйи пу улын пелька йӧктылісны, гажӧдчисны, сьылісны нывъяс. Пулӧн кыз вожъяс вылын быдмисны гӧгрӧс кольяс. Найӧ кыскисны ас дорас челядьӧс.

*И.Коданӧв серти*



**Нартитны** – омӧльтны, ӧбидитны, дойдны.



*Грезд помын уна во быдмис тшап, мича сус пу. [ӧ, ӧ]*

◆ Лыдды ӧтсыма юкӧдъяса сёрникузяссӧ колана шуанногӧн.

◆ Мыйла текстыслы сетӧма татшӧм юрним?

◆ Мый тэ нӧшта тӧдан сус пу йылысь?

◆ Серпас да текст серти дасьты «Мича сус пу» серпаса гижӧд.

**40 удж.** Лӧсьӧд текст-мӧвпалӧм «Мыйла колӧ видзны парма-вӧр?»

**41 удж.** Лыдды колана ногӧн кывбурсӧ.

### Миян вӧр.

Шувгӧ, увгӧ гажа шыӧн  
Миян паськыд коми вӧр.  
Некор чӧв оз овлы сылӧн  
Гажа яг выв, парма шӧр.

Ар и тулыс, тӧв и гожӧм  
Сійӧ сулалӧ пыр веж.  
Сус пу, ньыв пу, коз и пожӧм  
Мичаӧсь во гӧгӧр чӧж.

*М.Лебедев*

◆ Инды медводдза сёрникузяысь ӧтсыма юкӧдъяссӧ да висьтав, кызди найӧ йитчӧмаӧсь.



**42 удж.** Гиж текстсӧ чутікъяс пукталӧмӧн.

### Сус пу.

Кыксӧ во сайын Кӧрнил нима морт Уралысь вайлӧма ас сиктас неыджыд сус пу. Уна вонад ичӧт пуыд сӧвмӧма паськалӧма. Унаысь бушков чард-гым куснявлӧмаӧсь чегъявлӧмаӧсь пулысь увъяссӧ. Но ён пуыд абу сетчӧма крепыда вужъясьӧма муас. Со и ӧні тайӧ мича сус пуыс гажӧдӧ сиктса йӧзӧс.



## Өтсыма юкөдъяс костын А, НО кывйитөдъяс.



Кыдзи гижигөн торйөдоны өтсыма юкөдъяс а, но кывйитөдъяс дырйи?

43 удж. Лыдды. Корсь өтсыма юкөдъяссө.

### Катьö тьötка.

Кыдзрас грездын оліс косіник да шань Катьö тьötка. Сійö оліс өтнас, но некод вылö эз элясьлы. Олöма ань видзис ыж да чипан. Катьö тьöt эз дышöдчы, а пыр уджаліс горт гөгöрыс.

44 удж. Видзöд схемаяссö да гөгöрвоод өтсыма юкөдъяс костын чутік пуктöмсö.

... оліс, но эз элясьлы.

... эз дышöдчы, а уджаліс.

Схема: [Ö, но Ö]

Схема: [Ö, а Ö]



Өтсыма юкөдъяс йитчöны а, но кывйитөдъясөн.  
А, но кывйитөдъяс водзын век сувтöдоны чутік.

45 удж. Лыдды кывбурсö да инды өтсыма юкөдъяссö.

Мöдлапöв сёнын  
Журöдчö трактор,  
Ытшкö и куртö,

Турун юр вöчö,  
Керкаысь джуджыд  
Зорöдъяс тэчö.

*А.Ванеев*

### Турун пуктөм.

Гожөмнад турун пуктөмыд абу кокни удж. Турун пуктан каднад йөз оз дышөдчыны, а зiля уджалöны. Öд колö ытшкыны, куртны, юравны, зорөд места вöчны да зорөдсö кужөмөн тэчны.

Талун ыджыд котырөн петисны турун куртны да зорөд чөвтны. Пöль эз жö пукав гортас, а зорөд места дасьтис. Бать турун чөвтис. Катьö тьотка куртис да лөддзалис турунсö. Мишук ичөт на, но зэв зиль. Сийö тэрыба юрасис. Ваня да Дима кык зиб вылын котрөдлисны турун юрьяссö зорөд дорө.



Рытнас карта сайын зымвидзис ыджыд зорөд<sup>④</sup>.

◆ Сёрникузяясысь öтсыма юкөдъяссö петкөдлы схемаөн. Сёрникузяяслысь сьöрсьөн-бöрсьөн мунөмсö инды лыдпасөн.

◆ Мыйла турун пуктигөн колö уджавны öтсöгласөн?

◆ Öтсыма юкөдъяса сёрникузяяс пыртөмөн висьтав турун пуктан удж йылысь.

◆ Төдчөдөм кывъяслысь висьтав гижанногсö.



Схемаяс: 2) [Ö, а Ö]. 3) ...



**47 удж.** Лыдды текстсö. Бөрйы да гиж схемаяслы лөсялан öтсыма юкөдъяса куим сёрникузя.

### **Катьö тьötлы öтсöг.**

Асывсяньыс Ваня да Дима мөдөдчисны Катьö тьötка ордö. Найö босьтисны көрт тув тыра доз да мөлöt. Зонкаяс дзоньталисны чипан йöрсö, тутш-тотшкерисны дзирьясö да лөсьöдыштисны сарай öдзöссö. Катьö тьötка отсасысьясöс аттьöалис, гөститöдiс чöскыд кампетөн. Зонкаяслы вöли нимкодъ.

Схемаяс:

1. [Ö, Ö, да Ö]
2. [Ö да Ö]
3. [Ö, Ö]



### **Öтсыма юкөдъяса сёрникузясын пунктуация пасьяс.**



Кор öтсыма юкөдъяс костын колö пуктыны чутiк, а кор оз ков чутiкыс?

**48 удж.** Лыдды текстсö. Аддзы öтсыма юкөдъяса сёрникузяссö. Висьтав, кыдзи йитчöмаось öтсыма юкөдъясыс.

Тöрытсаянь нин Ваня да Дима дасьтисны шатинъяс, корсисны нидзув<sup>①</sup> да пучöй. Ю бокö вöчисны пукаланiн. Кык ёрт пысалисны вугыраныс нидзув, мөдiсны вуграсьны.

Друг ю вылын уркнитiс. Ю шөрö öдйö петiс мотора пыж да матыстчис челядь весьтö<sup>④</sup>. Пыж бёрся ваыс быттö пуис. Ыджыд гыыс швачнитiс берегö, пөрöдiс зонкаяслысь нидзув дознысö.

Шогö уысисны челядь. Самтöгыд черитö öд он кый...

- ◆ Юрнимав текстсö, инды шөр мөвпсö.
- ◆ Лөсьöд текст-мөвпалөм: «Мыйла ёртъяслөн эз артымы вуграсьöмыс?»

**49 удж.** Тöдмав, код йылысь висьтавсьö.

1. Сьöрсыйс мышноп новлö, мича прöшви кыö.
2. Гожöмнас дзизгö, дözмöдчö.
3. Дзоридзьяс пöвстын лэбалö, ма вайö.
4. Турун пöвстын чеччалö, чирксö.

- ◆ Кутшöм юкöдъяс лооны öтсямаөн?
- ◆ Кыдзи торйöдчöны öтсяма юкöдъяс?

**50 удж.** Гиж висьтысь öтсяма юкöдъяса сёрникузя-яссö. Пуктав, кытчö колö, чүтйкъяс.

Пажын бöрас петис уна **геб-ном** юрсигусь<sup>④</sup>. Ваня öвтчис вöтлалис сы гөгөр бергалысь юрсигусьясöс.

– Юрсигусь мöдис лэбавны – зэрмыны<sup>②</sup> кöсйö, – юöртис бать. – Гортлань<sup>②</sup> мöдöдчам. Тырмымөн нин талун чериыс шеді. Аски мамыд юква пуас да **черинянь** пöжалас.

Рытланьыс<sup>②</sup> **енэжыс** визьён пöртмасис, мичаа востымасис. Войнас шливгöмөн зэрмис.

- ◆ Мый серти батыс тöдмалис зэр матыстчöмсö?
- ◆ Мый серти йöзыс водзвыв тöдмалöны зэра поводдясö? Уськöд тöд вылад коми приметаяс.
- ◆ Тöдчöдöм кывъясылысь гөгөрвоод гижанногсö, инды орфограммасö да вайöд сійö жö орфограммаа кык кыв.



*Бөр-ва – отувтан вежортаса тэчаса эмакыв, гижсьö визь пыр: пила-чер, ки-кок.*

**51 удж.** Лыдды.

Водз асылын Ваня да Дима восьлалісны видз вывті. Лысваыс мыськаліс налысь көмнысö. Со и Гöгрöс ты. Медводз ёртъяс пестісны бипур. Ваня тыысь вайис ва, сэсся найö мöтыр вылö öшöдісны пöрт да пöртійö шыбитісны сэтöр кор. Сэтöра чай юöm бöрын зонкаяс заводитісны вуграсьны. Лунтырнад ёртъяслы шедіс некымын ёкыш да йöрш. Рытланьыс рад детинкаяс мöдöдчисны гортлань<sup>④</sup>.

◆ Кымын юкөн текстас?

◆ Инды текст сикассö да юрнимав. Тöдмав текстлысь темасö да шöр мöвпсö.

◆ Аддзы öтсыма юкөдъяса сёрникузяяс.



**Мöтыр** – бипур весьтö пусян доз öшöдан көрт либö пу бедь.



**52 удж.** Артмöд сёрникузяясысь висьт да гиж лöсялана шыпасъяс содталöмөн.

Сэн... эм уна чери. Сикт бокті визувтö джуджыд да пас...кыд ю.

Гортö найö ва...исны уна ёкыш, йöрш, еді. Дима да Ваня радейтöны чери кы...ны. Ю дорын кыкөн пукал...сны пажынöдз. Öти асылö найö мöдö...чисны вадорö.

## ШЫ ДА ШЫПАС



**Гласнӧй да согласнӧй. Чорыд да небыд согласнӧйяс. Гора да гортӧм согласнӧйяс.**



Мыйӧн торъялӧны гласнӧй да согласнӧй шыяс, чорыд да небыд, гора да гортӧм согласнӧй шыяс?

**53 удж.** Лыдды кывъяссӧ да орччӧд.

Кор–гор, кар–гар, зыр–сыр, дыр–тыр, бур–пур, дзир–чир.

◆ Инды кыв параяссьыс гласнӧй шыяс.

◆ Мыйӧн торъялӧны кывъяссыс?

◆ Гӧгӧрвоӧд вежӧртассӧ **дзир-чир** кывъясслысь да лӧсьӧд кык сӧрникузя.

◆ Гиж кывъяссӧ да визьнит параа гора да гортӧм согласнӧйяссӧ. Мыйӧн торъялӧны ӧта-мӧдсьыс гора да гортӧм согласнӧйяс?



**54 удж.** Тӧдмав. Мыйӧн торъялӧны кывъяссыс?



1. Гортӧм согласнӧйӧн – матысса морт,

Гораӧн – мичмӧдӧ ю дор и сӧрд.

2. Гортӧм согласнӧйӧн вуджӧ ёль вомӧн,

Гораӧн – шыр да руч сӧні – ас чомйын.

**55 удж.** Лыдды кывъяссӧ. Торйӧд быд кывйысь медводдза шысӧ. Бӧрйы да гиж небыд согласнӧйсянь заводитчысь кывъяссӧ.

Сэтӧр, лежнӧг, чӧд, лӧбач, дзоридз, джыдж, сьӧлаоз.

56 удж. Лыдды текстсö да сет мөд юрним.

### Оз вотігөн.

Өтчүд нöрыс бокин воті кисьмөм оз. Тайö кадö ягсянь<sup>①</sup> лэбис лэбач чукөр. Лэбачьяс мөдісны кытшлавны ме весьтын.

Ме нюжөді киос оз тусьла. Турун пытшсьыс казялі кык лэбачпиос. Виж нырнысö чургөдөмаось вывлань да сьод сэтөр синнас дзоргöны ме вылө.

Бөлись гөгөрвои лэбачьяслысь майшасьөмсö да эновті вотчөмөс.

*С.Раевский серти*

◆ Гиж текстысь кум слога кывъяс. Визьнит гижөм кывъясысь гласнөйяссö.

◆ Торйөдөм кывъяслысь висьтав гижанногсö.



*Лэбачьяс, ...*

57 удж. Лыдды кывбурсö да гиж юрвежсьыд.

### Оз.

Дзебыштöма банийөм юрсö

Озйыс турун пиö.

Бурөн сійö оз и сюр сэсь,

Оз и веськав киö.

*В.Лодыгин*

◆ Вайөд оз эмакывлы өткодя юргысь кыв да гөгөрвоөд налысь вежөртасьяссö.

◆ Кыдзи гөгөрвоан банийөм кывлысь вежөртассö? Вайөд синонимъяс.

◆ Инды зумыд кывтэчасьяс.



**58 удж.** Гиж комиён. Гөгөрвоёд кывъясын э, і шыпасъяслысь гижанногсö.

Пчела, согрел, солнце, он, тут, было, лец, остров, дождь.



**Согласнойяс бöрын і да И шыпасъяс гижöм.**



Мыйла гижигён гласной [и] шысö петкөдлöны кык пöлöс шыпасён?

**59 удж.** Лыдды колана ногөн.

**Шондыс** кытшовсö уліджык босьтö,  
Абу нин гожся моз яр.  
Став рöмсö-мичлунсö вөр-валысь восьтис,  
**Зарниён** серöдис ар.

*И.Торопов*

- ◆ Кыдзи гөгөрвоан: «*Зарниён серöдис ар*»?
- ◆ Гөгөрвоёд тöдчöдöм кывъяслысь гижанногсö.
- ◆ Кывкөртöдав і да и шыпасъяс гижанног йылысь.
- ◆ Кутшöм шыпасъяс бöрын і оз паныдасьлы?

**60 удж.** Лыдды текстсö. Гиж колана шыпасъяс содталöмөн.

Со и мыччысис шонді. Кажитчö сійö ичöt...көн, но мича да вынйöра. Сылысь петöмсö медводз казялöны л...бачьяс, пötкаяс. Та йылысь пыр жö висьталасны

гажа с...ылөмөн, асланыс кыв...яс вылын варовитөмөн. Шонділысь<sup>3</sup> петөмсö төдöны черияс, гут...яс да гаг...яс. Шонділы радлöны н...нь быдтыс...яс, чери кыйыс...яс, вöралыс...яс да көр видзыс...яс. Шонді быдөнöс гажөдö да шонтö<sup>4</sup>. Шонді петөмсянь пуксьö выль олөм.

*И.Коданёв серти*

◆ Кызди гөгөрвоан: «Шонді петөмсянь пуксьö выль олөм»?

◆ Инды текстысь öтсеяма юкөдъяса сёрникузяяс да висьтав, кызди найö йитчöмаось. Гөгөрвоод пунктуация пасъяс сувтөдөмсö.

◆ Аддзы текстысь согласнöйяс бöрын и да i гижөм вылö кывъяс.

**61 удж.** Лыдды внуклысь дедыскөд сёрнисö.

### **Быдөн нюжөдчö шонділань.**

Ваньö пуксьыштис дедушыскөд орчөн конда вылö, а сэсся водис яла вылö.

– Видзөд, дедуш, кутшөм веськыдöсь гырысь пожөмъясыс.

– Югыд шондіыс найöс веськөдö. Вывлань, югыдлань кыссьöны найö чужөмсяньыс. Быттьö төдöны, мый шондитöгыд да шонид зэртöгыд налы не овны.

– Быдөнлы колö шонді,– мөвпыштөм бöрын шуис Ваня.

– Да, ставыс артмөма югыд шонді улын!

*И.Торопов*



**Конда** – вуж вылас косьмөм, сэсся пөрөм сирөд пу.

◆ Кызди гөгөрвоан дедыслысь шуёмсө: «*Ставыс арт-мөма югыд шонді улын*»?

◆ Висьтысь гиж і шыпаса кывъяс. Вайёд татшөм орфограммаа мукөд кывъяс.



**62 удж.** Гиж шыпасъяс содталөмөн да гөгөрвоөд кывъяслысь гижанногсө.

Асывводз. Вөр сайсянь быликт...с доналөм шар моз шонд... . Видзөдл...с гөгөр унз...ль с...нъяснас, быттьө серөкт...с. Сэсся чукөрөн сялькнит...с зарни югөр. Пёртмас...гтырйи өшөдч...с енэжө.

*Г.Фёдоров серти*



**Ъ да Ъ торйөдан пасъяс.  
Ь – небыдлун петкөдлан пас.**



Кутшөм шыпасъяс бөрын гижөны торйөдан **ъ** да **ь**?  
А кор гижөны небыдлун петкөдлан пас?

**63 удж.** Лыдды гижөдсө. Гиж торйөдан **ъ** да **ь** пасъясса кывъяс.

**Эжва.**

Мотора пыжөн ми катам Эжваөд вывлань. Ытва кырөдөма крут нөрыссө. **Кызъяс** да **пипуяс** нөровтчөма-ось валань. Налөн плеть кодь **вужъясыс** чурвидзөны ортсын. Ва улынось **сёнъяс**. **Бадъяс**<sup>①</sup> ылісянныс кажитчөны турун лёдзьясөн.

Ямас ытва, и воас гожом. Тайо кадö Эжва-матушка кыскö ас дорас чери кыйысьясöс. Жар лунъясö визув юын лöсьыд купайтчыны. Рытнас ю дорын кылö гажа серам да мыла сьыланкывъяс.

*С. Некрасов серти*

◆ Гөгөрвоод торйöдöм кывъяслысь гижанногсö.

64 удж. Лыдды кывъяссö. Мөвпышт, кымын чукөрö найöс позьö юкны.

Видзъяс, пыжъяс, шыяс, визъяс, гыяс, зорöдъяс.

◆ Гиж кывъяссö чукөръяс вылö юклöмөн да гөгөрвоод.

65 удж. Лыдды да гиж коланаинö ь либö ь пасъяс содталöмөн.

Эжва ассыс кузь туйсö заводитö дзоляник шорсянь. Дзор коз...яс да нитшка вутш...яс бокö дзебсяс...öмөн сийö пис...көдчö войвывсян... лунвылö. Чукөртö уна ёл... да вочасөн пас...калö. Сэсся петö пас...кыд вос...са эрд...яс вылö. Чöскыд веж туруна паськыд видз...яс пöлөн Эжва водзö кылөдö ассыс васö. Сикт...яс, грезд...яс да вөр...яс пöлөн сийö нуö сөстөм васö пыр водзö и водзö.

*Б. Шахов серти*

◆ Кутшöм кывъясын ь петкөдлö согласнойлысь небыдлун?

◆ Кутшöмъясын ь лоö сöмын торйöдан пасөн?

◆ Б.Шахов гижӧдысь аддзы ӧтсыма юкӧдъяса сёрни-кузяс да тӧдмав юкӧдъяссӧ.

◆ Висьтав, мый тӧдан Эжва ю йылысь. Дасьты не-ыджыд текст.

**66 удж.** Лыдды кывбурсӧ колана ногӧн.

Эжва юӧй, шондӧбанӧй, –  
Коми мулӧн сьӧлӧмшӧр!  
Мам кодъ овывлан тэ  
  шаньӧн,  
Видзӧдласыд абу скӧр.

Эжва юӧй, шондӧбанӧй, –  
Эзысь чери быдтысь ёрт.  
Сын и ёдӧ **чериняньӧн**  
Йӧзлысь озырмӧдан горт.

*А. Некрасов (Гамса)*

◆ Кызди гӧгӧрвоан: «Мам кодъ овывлан тэ шаньӧн, видзӧдласыд абу скӧр»?

◆ Гӧгӧрвоӧд торйӧдӧм кывъяслысь гижанногсӧ.



**67 удж.** Висьтав, кутшӧм правилӧ серти вуджӧдӧны ӧти визысь мӧдӧ кывъяссӧ.

Разьсис, зибъяс, вижъюр, кызъяс, пасьтасьны.

◆ Быд правилӧ вылӧ ачыл вайӧд ӧти кывйӧн да гиж.



**68 удж.** Комиӧд кывъяссӧ да гиж.

Грибы, березки, васильки, птицы, бабочки, пчѐлы, ромашки.

◆ Гӧгӧрвоӧд торйӧдан **ь** да **ъ** пасьяс гижанногсӧ.

◆ Лӧсьӧд кык сёрникузя.

## КЫВЛӨН ТЭЧАС



**Кыввуж. Өтвужъя кывъяс да кыв формаяс. Кыввужйын содтана [й], [к], [м], [т] шыяс.**



Мый сійö өтвужъя кывйыс да кыв формаыс?  
Кызди торйöдны өтвужъя кывъяс öти и сійö жö кывлөн формаясыс?



**Кыввуж** – тайö кывлысь шöр вежöртас кутысь медтöдчана юкөн: *гижöд, гижысь, гижны, гижöм*.  
Сетöм кывъясын кыввужйыс *гиж-* .

69 удж. Орччöд кыв параяссö.

кымöр – кымöръяс

кымöр – кымöра

◆ Öткодьöсь-ö вежöртасъясыс кымöр – кымöръяс кывъяслөн? А мыйөн найö торъялöны?

◆ Мыйөн торъялöны вежöртасъясыс кымöр – кымöра кывъяслөн?

◆ Кывкöртöдав: мый сэтшöмыс өтвужъя кывъяс да кыв формаяс?



**Өтвужъя кывъяс** – тайö öткодь кыввужъя, но виль вежöртаса торъя кывсикаслы лöсялысь кывъяс: *ном – номйöсь, гыöр – гыöртіс*.

Кыв формаяс – тайö öти и сійö жö вежöртаса кывсикаслөн вежласян формаяс: *кар, каръяс, карö, карын, карысь, карлань, карыд*.

70 удж. Лыдды. Гиж торъя чукөръясö өтвужъя кыв параяс да кыв формаяс. Быд кывйысь инды кыввужсö.

Пач – пачсянь, небыд – небзис, югыз – югнитис, рыт – рытлань, топыд – тоपालис, шылъыд – шылялис.



71 удж. Лыдды кыв параяс да инды кыввужсö.

Коз – козйыс, нитш – нитшкыс, син – синмыс, гөп – гөптыс.

◆ Кутшөм содтана шыяс тэ казялін быд паралөн мөд кывйысь? Кывкөртöдав.

Эмакыв кыввуж помын паныдасылöны [й], [к], [м], [т] содтана шыяс.



Тайö шыясыс лоöны кыввуж юкөнөн да петкөдчöны сы бöрын сулалысь гласнöй шы водзын: *вуж – вужйыс, лыс – лыскыс, ун – унмыс, зеп – зептыс.*

72 удж. Лыдды. Аддзы да гиж кывбурысь [й], [к], [м], [т] содтана шыяса эмакывъяс.

### Чöd да тшак.

Чödтö вотны меным дыш,  
Мудзö кок и мудзö мыш.  
Сэтшöм ньöжйö дозйыд  
тырö,  
Да и номйыс синмад пырö.

А вот тшактö вотны бур!  
Но мед яг, а абу нюр.  
Эм кö тшакыд, оз и дырөн  
Ыджыд дозйыд чукйөн  
тырö.

*Г.Юшков*

◆ Кымын [й], [к], [м], [т] содтана шыяса эмакыв паныдасьлө кывбурас?

◆ Кыдзи колө тōдмавны, содтысьōны-ō эмакыв кыввуж помын [й], [к], [м], [т] шыясыс?

 Вермōны-ō лоны й, к, м, т суффиксьясōн?

73 удж. Артмōд сетōм кывъясысь й, к, м, т суффиксьяс отсōгōн кадакывъяс. Петкōдлы суффиксьяссō.

Пас, трач, том, вошны, скōр.

◆ Мыйла й, к, м, т лоōны суффиксьясōн?

74 удж. Тōдмав, мыйōн лоōны сетōм кывъясын [й], [к], [м], [т] шыяс – кыввуж юкōнōн али суффиксōн. Гиж колана лыдпас.

нимтыны – ...

гирсьйыны – ...

гōптись – ...

швачкыны – ...

унмыс (локтō) – ...

1. кыввуж юкōн

2. суффикс



75 удж. Лыдды шмонитана кывбурсō. Гиж сийōс, аддзы ōтвужъя кывъяс да петкōдлы кыввужсō.

### Визув синма.

Визув синма быдмō Юра,  
Ставсō аддзō вывті бура.  
Но оз аддзы, синтōг олō,  
Мыйкō идравны кō колō.

Г.Юшков



## Кывдін да кыв вежлалан суффиксьяс.

Мый лоо кывдінөн?

Мыйла колёны кыв вежлалан суффиксьяс?



Кутшом кывсикасьяслөн эмось кыв вежлалан суффиксьясыс?

Мый петкөдлөны эмакывлөн да кадакывлөн кыв вежлалан суффиксьясыс?

**76 удж.** Төдмав кывсикассө, инды кывдінсө. Гөгөрвоод төдчөдөм суффикс вежөртассө.

Улөсь-яс, олө-ны, нянь-ла, велал-і, локт-ө, ол-а-н.

1. *Кадакывлөн уна лыда суффикс.*

2. *Эмакывлөн вежлөга суффикс.*



3. *Кадакывлөн колян кад петкөдлысь суффикс.*

4. *Эмакывлөн уна лыда суффикс.*

5. *Кадакывлөн өнія када да коймөд морта суффикс.*

6. *Кадакывлөн өнія када суффикс.*



**Кывдін** – кыв вежлалан суффикстөм юкөн. Кывдінын вермөны лоны сөмын кыввуж да кыв артмөдан суффиксьяс: *сикт, сиктса, паськыдін, вайышт*. Кывдінсө пасйөны \_\_\_\_\_.

**77 удж.** Төдмав суффикс серти лөсөвтөм кыв парасө.

1. Шорлань – нюрлань, вөрись – карө, ёртлөн – пөльлөн, локтө – муна.

2. Ньөбөны – юасьөны, быдтөны – дөзьөритөны, жөдзөны – ветлөдлөны, тысьянь – пусянь.

78 удж. Лыдды.

### Енбиа морт.

Степан Семёнович Раевскийлөн ни-мыс тӧдса коми челядылы. Сійӧ гижис уна бур небӧг. Вежӧра морт ыджыд пай пуктіс велӧдчан небӧгъяс дасьтӧмӧ.

Чужліс Степан Семёнович Сыктив-вожса Межадор сиктын. Сійӧ по-ма-ліс пединститут, уджаліс велӧдысьӧн Изьва районса Мокчойын. Сэсса рес-публикаса юркарын кызь во чӧж весь-кӧдліс Коми небӧг лӧдзанінӧн.

Гижысь, вуджӧдчысь да небӧг лӧ-дзысь – татшӧм паськыд да ясыд олан туйыс ыджыд енбиа да уджач Степан Раевскийлӧн.



*Г.Беляев серти*


- ◆ Инды текстысь сӧмын кыввужъя эмакывъяс.
- ◆ Инды текстысь вежлӧг суффикса эмакывъяс.



**Енбиа** – ыджыд сяма да таланта.

79 удж. Аддзы 78-ӧд уджын сетӧм текстысь да гиж:

- 1) уна лыда эмакывъяс;
- 2) -ыс суффикса эмакывъяс;
- 3) вежлӧг суффикса эмакывъяс.

- ◆ Кыв вежлалан суффиксыссӧ индав  пасӧн.
- ◆ Инды аснимъяс.

**80 удж.** Лыдды. Эмакывъяссö да кадакывъяссö вид-  
лав кыв тэчас серти.

Степан Семёнович Раевский пöся радейтис войвыв,  
вөр-ва, сәні олысь пемöсьясöс, быдмөгъяс. Аслас гижöдъ-  
ясын сійö зилис чужтыны посни войтыр сьöлöмын парма  
дорö тöжд да муслун.

◆ Инды сёрникузяясысь öтсяма юкöдъяс.



**81 удж.** Гиж кывбурсö. Тöдчöдöм кывъяссö видлав  
тэчас сертиыс.

Видзны мөвпъяс сöмын вермö  
Книга помтöм уна кад.  
Некор книгаөн он йөрмы,  
Быд морт книгаыдлы рад!

*Н. Щукин*

◆ Помтöм кывбердлы вайöд öтвужъя кывъяс.



**Кыв вежлалан суффиксъяс да кывдін.**

**82 удж.** Лыдды.

**Ош мыссьöм.**

Вöрса юö усьö вож.  
Сэтөн, визув шöрас,  
Ошпиянсö мыськö ош  
Вөрöд ветлöм бöрас.

Ошпияныс сылөн кык,  
Ньöти абу рамось.  
Та вöсна и кылö зык,  
Мурзö весиг мамыс.

Кыкнан писö тюльс да тюльс  
Ваö мамыс суйлö.  
Да и ачыс бульс да бульс  
Ваас водлö-куйлö.

Мыссьöм вылас эз и вош  
Кадыс налөн уна.  
Со нин водзö долыд ош  
Пияныскöд мунö.

*Г. Юшков*

◆ Тöдмав вежöртас-  
сö кыв вежлалан -ö  
суффикслысь юö да  
устьö кывъясын?

◆ Вайöд мамыс кыв-  
лы тэчас серти лöсялана  
кывъяс.

◆ Кутшöм мойдъяс  
да кывбуръяс тэ тöдан  
ош йылысь?



**83 удж.** Аддзы кывбурысь сетöм тэчаса кывъяс.

1)  2)  3) 

**84 удж.** А кызди тэ мөвпалан?

Велöдысь корис гижны «Ош мыссьöм» кывбурысь  
кыв вежлалан суффикстöм эмакывъяс.

Кывбурысь Настя аддзис нель кыв вежлалан суф-  
фикстöм эмакыв: **ош, зык, вож, визув.** А мукöдыслы кыв-  
бурсыс сюрис унджык эмакыв.

Кутшöм кывъяс абу торйöдöма Настя? Мыйла нывка-  
лы сьöкыд вöлі аддзыны став эмакывсö?



85 удж. Видлав сёрникузясö юкөдъяс серти. Эмакывъяслысь тöдмав вежлөгсö.

Ошпиянсö мыськö ош.

◆ Видлав сёрникузьяысь став кывсö тэчас серти.



### Кыв артмöдан суффиксьяс.



Кутшöм суффиксьяс лоöны кыв артмöданаöн?  
Мыйла колöны кыв артмöдан суффиксьяс?

86 удж. Кызди артмöмаöсь сетöм кывъясыс? Петкöдлы суффиксьяссö ^ пасöн.



пыхны (кадакыв) → пыхöд

Горшлун, вильтор, пожöмаин, кодзула, сирöсь, гажтöм, олöм, турунöсь.

87 удж. Лыдды.

### Важ йöз олöмысь.

Археологъяслөн раскопкаяс отсалöны тöдмавны важ йöзлысь историясö да оланногсö. Медшöр прöмысөн комияслөн вöли вöралöм да чери кыйöм. Вöр да юяс вердiсны войвывса йöзöс, пасьтöдiсны да кöмöдiсны кучика кöм-паськöмөн. Гöна куыс шонтiс кöдзыд кадö. Кучикысь<sup>3</sup> вöчисны гортса да вöралан паськöм, уджалан кöлуй.

Вылö донъявлісны гöна куяссö ветлысь-вузасьысь купечьяс. Куяс былö войвывса йöз ньöблывлісны порок, ружье да нывбабаяслы баситчанторьяс<sup>4</sup>. Небыд гöна көлуй ёна озырмöдіс Россиялысь<sup>3</sup> казнасö.

Небыд зарни аддзис аслыс туй и лунвывса карьясö. Сы пыдди войвылö локтіс уна мича көлуй, денъя да мичмöдчантор.

*К.Королёв серти*

**Археология** – му пытшкысь важ көлуй корсьöмön важ йöзлысь оласног тöдмалан наука.



**Раскопка** – му пытшкысь кодйысьöмön важ көлуй корсьöм.

**Баситчантор** – мича новлантор, мичмöдчантор.

◆ Аддзы текстысь öтвужъя кывъяс.

**88 удж.** Аддзы да гиж «Важ йöз олöмысь» текстысь кыв артмöдан суффикса кывъяс. Инды суффиксьяссö ^ пасöн.

- 1) **-öм** суффикса эмакывъяс
- 2) **-тор** суффикса эмакывъяс
- 3) **-са** суффикса кывбердъяс
- 4) **-а** суффикса кывбердъяс



**89 удж.** Сетöм сёрникузяысь видлав кывъяссö тэчас сертиыс.

Войвывса йöз гöна куяс былö ньöбисны порок, ружье.

◆ Вайöд да гиж öтвужъя кывъяс йöз кывлы.



## Тэчас сертиыс кыв видлалём.

?

Кызди колё торйөдны кывлысь юкөнъяссө?

**90 удж.** Лыдды да гөгөрвоод, торъялөны-ө орччө-дөм кадакывъясыс. Мыйөн торъялөны? Инды суффиксь-яссө ^ пасөн.



*Корны* → *кoryштны*.

Вежны – вежыштны, тэчны – тэчавны, кольны – кольөдны, ворсны – ворсөдны, сетны – сетавны.

**91 удж.** Лыдды.

### Коді мыжа?

Көза видзө менам мамө:  
Чөрт кодь сюра<sup>②</sup> да и сяма.  
Ньөрйөн гидө йөртны куті,  
Зяткис сюръяснас, и туті...

Нөшта вөтчис тошка юрнас,  
Потшөс костө сибдіс сюрнас.  
Майөг рутшка-ратшкакылө:  
Мыжсө вештісны ме вылө.

*А.Мишарина*



◆ Кутшөм сьөкыдлун вермас паныдасыны ньөрйөн да тошка кывъяс тэчас сертиыс видлалігөн?

◆ Кутшөм кывъясөн А.Мишарина рифмуйтөма кыв-бурсө?

**92 удж.** Лыдды да орчөд, өткөд-ө тэчасыс **көза**, **коза** кывъяслөн комиын да рочын. Видлав кывъяссө тэ-час сертиыс.

◆ Мый петкөдлө роч **коза** кывйын окончаниеыс?

**93 удж.** Гиж сетөм план серти көза либө кутшөмкө мөд пемөс йылысь сочинение.

1. Көза (кань, мөс, вөв, порсь, ыж) – гортса пемөс.
2. Кытысь тэ төдан пемөс йылысь?
3. Кутшөм сийө ортсысянныс?
4. Кутшөм оласногыс пемөслөн (көні олө, мый вөчө, мый сөйө)?
5. Мыйла видзөны пемөссө?



### **Кыв юкөнъяс.**

Кутшөм юкөнъясысь артмө кыв?

Кутшөм юкөн петкөдлө кывлысь медшөр вежөртассө да лоө медтөдчанаөн?

Көні сулалө кыв артмөдан да кыв вежлалан суффикс?

**94 удж.** Лыдды кыв параяс. Аддзы быд чукөрысь лөсаятөм кыв пара да подулав.

1. Лыда – лыдтөм, номъя – номйөсь, кодзула – кодзувтөм, кепыся – кепысьтөм.

2. Гортысь – гортө, сиктлань – сиктсянь, воккөд – воктөг, школаын – школалөн.

3. Тундраө – карө, йөктө – сералө, дорйө – вензьө, кымрасьө – зэрө.

Коми кывйын эм паныд вежортаса да откодя юргысь суффиксьяс.

Паныд вежортаса суффиксьяс **-а** да **-тӧм**, **-лань** да **-сянь**, **-ысь** да **-ӧ**: *кӧма – кӧмтӧм, керкалань – керкасянь, школаысь – школаӧ*.

Откодь шыяса, но вежортаснас торъялана суффиксьяс: пыран вежлӧг петкӧдлысь **-ӧ** да кадакывлӧн ӧнія кад петкӧдлысь **-ӧ**: *юкмӧсӧ – видзӧдӧ, керкаысь – велӧдысь*.

**95 удж. Лыдды.**

**Чудь йылысь археологьяслӧн аддзӧмторьяс.**

Эжва пӧлӧн да Усть-Сысольскын археологьяс нуӧдисны раскопкаяс. Найӧ аддзисны чудь йӧзлысь оланінгьяс.

Чудь йылысь олӧ уна легенда. Тайӧ войтырыс абу кӧс-йылӧма пырны выль эскӧмӧ. Найӧ пышйӧмаӧсь мӧдлаӧ да гуасьӧмаӧсь. Чудьяс вӧлӧмаӧсь ыджыд вежӧра йӧзӧн.

Найӧ волысьӧмаӧсь ылі суседьяскӧд, веж-ласьӧмаӧсь накӧд кӧлуйӧн, ньӧбасьӧмаӧсь.

Чудьлӧн олӧм йылысь висьталӧны<sup>2</sup> да сӧд нэмся эзысь деньга да исергаяс, сынан, сикӧтш да мукӧд мичмӧдчантор.



*К. Королёв серти*



**Чудь** – финн-угор вужвойтырса важ йӧз. Найӧ абу кӧсйылӧмаӧсь пырны Кростос вераӧ, та понда асьнысӧ гуавлӧмаӧсь.

◆ Вайӧд матын вежӧртаса кывъяс **войтыр, деньга, раскопка** кывъяслы.

**96 удж.** 95-ӧд уджысь вайӧд татшӧм тэчаса кывъяс. Гиж найӧс.

1.

2.

3.

4.



**97 удж.** Лыдды. Аддзы эмакыв, кывберд, кадакыв да видлав кыв тэчас серти. Инды кывдінъяссӧ.

Чудьлӧн олӧм йылысь висьталӧны дасӧд нэмся эзысь деньга да исергаяс, сикӧтш да сынан.



Индӧм темаясысь бӧрйы ӧтиӧс, дасьты проект да дорйы сійӧс.

Проект темаяс:

1. Ӧтвужъя кывъяс да кыв формаяс.
2. Эмакывъяслӧн кыв вежлалан суффиксяс.
3. Кадакывъяслӧн кыв вежлалан суффиксяс.
4. Кыв артмӧдан суффиксяс.
5. Кывдін.
6. Паныд вежӧртас петкӧдлысь суффиксяс.
7. Эмакывйын уна лыда, вежлӧг да морта суффиксяслӧн ӧта-мӧд бӧрся пӧрадок.



## Эмакыв. Эмакывлөн вежортас.



Мый петкөдлө эмакыв?  
Кызди торйөдны эмакыв мукөд кывсикасысь?

98 удж. Лыдды. Инды эмакывъяс.

### Турун пуктигөн.

Гожом шөр. Челядь доддясёны чом дорын. Чөвтисьяс да сюртчисьяс модөдчөны зорөд чөвтанинө. Мунөны тэрмасьтөг, варовитигмос.

Таво поводдяыд уджөдиc да тырыс бур туруныд сюри. Сөмын вад бокад туруныд омөльдзык лои, сотчыны вермас зорөдад. Вад боксыд ёна бур көрымыд этшаысь сурлывлө. Арнас уль турунтө водзджык ваясны.

Мунигмозыс йөз сёрнитөны турун, поводдя, нянь идралөм да сиктса выльторьяс йылысь.

*И.Белых серти*



Вад – вөрса ты.

**Сюртчись** – зорөд тэчөм бөрын турунсө зорөд улас сюялысь-тувкөдысь.

◆ Вайөд синонимьяс **сотчыны, омөльдзык кывъяслы.**

◆ Гөгөрвоөд вежортассө «*Тырыс бур туруныд сюри*» сёрникузяын **сюри** кивлысь. Кутшөм вежортас сетөм письяс лөсялө **сюри** кивлы: а) аддзисис вошлөмтор; 2) веськаліс; 3) шедіс, лоис.

99 удж. Аддзы да юклы 98-өд уджысь эмакывъяс-сö вежортас сертиыс.

1) Морт. 2) Места. 3) Керөм-вөчөм ним. 4) Оланін.  
5) Предмет. 6) Кад петкөдлысь ним.

◆ Быд чукөрө вайөд 1–2 кыв.

Эмакыв петкөдлө предмет, а сідзжө морт, ловъя лов, места, оланін, кад, керөм-вөчөм, сям, вын да мукөдтор.

Эмакывъяс вочавидзöны *кодi?* да *мый?* юалөмъяс вылö: *пызан, ныв, вöв, жыр, рыт, поткөдчөм, сюсьлун, ёнлун.*

Эмакывъяс артмöны кывбердысь *-лун, -тор, -ин* суффиксъясөн: *зильлун, выльтор, паськыдін;* кадакывйысь *-өм* суффиксъөн: *велөдчөм.*

Торъялöны ловъя лов да лөвтөм предмет петкөдлысь эмакывъяс.



100 удж. Вайөд öтуван вежортаса кывсö.

1. Вежай, вежань, чож, чой.
2. Балябöж, кымöс, гыррдза, пельпом.
3. Туис, чуман, пестер, вор.
4. Бушков, гым, гыөр, ру.
5. Лабич, улöс, джадж, пызан.
6. Ю, шор, ты, ёль.

Отсöг кывъяс: *ывлавыв петкөдчөм, пу көлуй, дозмук, туша юкөн (мыгөр), рөдвуж, вааин.*

◆ Вайөд сёянтор да паськөм вежортаса эмакывъяс.



101 удж. Гиж чутъяс пыдди колана кывъяс.

1. Воын ... тӧлысь. 2. Нэмын ... во. 3. Тӧлысьын ... вежон. 4. Суткиын ... час. 5. Вежонын ... лун.

◆ Кутшӧм вежӧртас ӧтувтӧ сетӧм эмакывъяссӧ?



**Эмакывлӧн нимтан, асалан, босьтан да сетан вежлӧгъяс.**



Кыдзи тӧдмавны эмакывлысь вежлӧгсӧ?

Мый висъталӧны ас йывсыйс вежлӧг нимъясыс?

102 удж. Мӧвпышт, кутшӧм кадакывъяс лӧсялӧны сетӧм эмакывъяслы. Лӧсьӧд да гиж кывтэчасъяс. Сет юалӧмъяс.

Ёртлӧн, ёртлы, ёртлысь.

Отсӧг кывъяс: *босьтны, сетны, вузавны, эм, юавны, козьнавны, висътавны, нуны, отсавны, корны, лоас, вӧлі, ньӧбны.*



*Босьтны (кодлысь?) ёртлысь.*

◆ Мый позьӧ висътавны вежлӧг йылысь сетӧм кадакывъяс сертиыс?

103 удж. Бӧрйы сетӧм кадакывъяс пиысь сетан да босьтан вежлӧглы лӧсялана кадакывъяс да лӧсьӧд кывтэчасъяс.

Норасыны, юавны, корны, висътавны, босьтны, ыстыны, мырддыны, юӧртны, петкӧдлыны, видзӧдлыны.

**Нимтан** вежлӧг петкӧдлӧ ловъя лов либӧ предмет, кодӧ керӧ да вӧчӧ. Нимтан вежлӧг вочавидзӧ **кодӧ?** да **мый?** юалӧмъяс вылӧ. Вежлӧг суффикссылӧн абу. *Вок велӧдчӧ. Пач ломтысьӧ.*

Асалан, босьтан да сетан вежлӧгъяс босьтӧны ёнджыка **кодӧ?** юалӧм вылӧ вочавидзан эмакывъяс.

**Асалан** вежлӧг вочавидзӧ **кодлӧн? мыйлӧн?** юалӧмъяс вылӧ. Петкӧдлӧ предмет либӧ лов, кодлӧн мыйкӧ эм. Вежлӧг суффиксыс -лӧн. *Воклӧн эм бур ёрт.*

**Босьтан** вежлӧг вочавидзӧ **кодлысь? мыйлысь?** юалӧмъяс вылӧ. Петкӧдлӧ кодлыськӧ мыйкӧ босьтӧм да корӧм. Вежлӧг суффиксыс -лысь. *Воклысь корны отсӧг.*

**Сетан** вежлӧг вочавидзӧ **кодлы? мыйлы?** юалӧмъяс вылӧ. Петкӧдлӧ кодлыкӧ мыйкӧ сетӧм да козьналӧм. Вежлӧг суффиксыс -лы. *Воклы козьнавны небӧг.*



**104 удж.** Лыдды текстсӧ. Аддзы да гиж текстсысь асалан вежлӧга эмакывъяс.

### **Канпас.**

Коми Республикалӧн канпасын серпасалӧма гӧрд щит вылын паськӧдӧм бордъяса варышӧс. Лӧбачлӧн морӧсас петкӧдлӧма Зарни Аньлысь чужӧм да сы гӧгӧр квайт йӧра юр. Зарни Ань – сийӧ став бурсӧ да вежасӧ видзись, долыдлун да бура олӧм вежӧртысь. Йӧра – сийӧ пармалӧн мич да ыджыд вынийӧр. Канпаслӧн зарни рӧмыс тӧдчӧдӧ югыд шондӧ да бур олӧм.





**Канпас** – республикалөн пас, герб.

◆ Эмакывъяс дорö сувтöд юалöм. Инды суффиксъ-яссö.

◆ Мый петкöдлö асалан вежлöгыс?

**105 удж.** Гиж. Пасъяв нимтан да сетан вежлöга эмакывъяс.



### Сыктивкарлөн герб.

Пармаса олысъяс вылö пуктисны вөр-ва. Йöз лыддисны вөр-васö ловъяөн, кевмылисны вөрлы, валы, пемöсъяслы<sup>2</sup>. Ош – войвыв-са йöзлөн парма көзяин. Ошкöс пыдди пуктöм петкöдчö республикаса юркар гербын.

◆ Лöсялана кивсянь сет юалöм сетан вежлöга кывъяс дорö, йитöдсö петкöдлы визьөн.

**106 удж.** Лыдды гижöдсö. Гиж тöдчöдöм эмакывъяссö да инды суффиксъяссö. Кутшöм вежлöглы лöсялöны?

### Дöрапас.

Коми Республикалөн дöрапасыс куим рöма. Лöз рöм тöдчöдö **вөр-валысь** отсö да **енэжлысь** сöстöмлунсö. Турунвиж рöм нимöдö Коми **мулысь** медыджыд озырлунсö – помтöм-дортöм парма. Еджыд рöм петкöдлö ярьюгыд рöма лым да **войвывлысь** мичлун.





**Дөрапас** – государстволөн, республикалөн пас, флаг.

◆ Висьтав, мый петкөдлө дөрапасын куим рөмыс.



**107 удж.** Вежлав ёрт эмакыв асалан, босьтан, сетан вежлөгъяс серти. Лосьод куим сёрникузя.



**Керан да керанторъя вежлөгъяс.**




Кутшөмось керан вежлөглөн суффиксъясыс?

Кызди торйөдны керан да нимтан вежлөга эмакывъяс?

**108 удж.** Гиж лөсялана кыв да төдмав вежлөгсө.

Виччысьны (*кодос?*) ... . Пөжавны (*мый?*) ... . Дөзмөдны (*кодос?*) ... . Киськавны (*мый?*) ... . Чуксавны (*кодос?*) ... . Восьтыны (*мый?*) ... .

Ытшкыны (*мыйөн?*) ... . Вердны (*мыйөн?*) ... . Нимкодясьны (*кодөн?*) ... . Ломтысьны (*мыйөн?*) ... . Ошйысьны (*кодөн?*) ... .

◆ Петкөдлы вежлөг суффиксъяссө  пасөн да төдмав эмакывъясслысь вежлөг вежөртассө.

◆ «Чой киськалө дзоридз» сёрникузяысь төдмав эмакывъясслысь вежлөгъяссө.

**109 удж.** Лыдды. Аддзы, сэсса гиж керан да керанторъя вежлөгъяса кывтэчасъяс. Сет юалөмъяс. Инды вежлөг суффиксъяссө.

Олісны-вылісны эня-пия. Налён вөлі зэв бур вөв. Пиыс муніс гуляйтны. Локтіс да и шуо:

- Мамөй, мамөй,  
Вөвтө өд мөскөн вежи.
- Бур, бур, пиөй,  
Йөвтортө сөйыштам.
- Мамөй, мамөй,  
Мөстө өд порсьөн вежи.
- Бур, бур, пиөй,  
Яйтортө<sup>①</sup> сөйыштам.

*Фольклорысь*

◆ Лыдды фольклор текстсө рольяс серти. Петкөдлы гөлөсөн шыөдчөмсө.

**Керан** вежлөг петкөдлө ловъя лов да ловтөм предмет. Вочавидзө *кодөс? мый?* юалөмъяс вылө.

*Гижны (мый?) письмө. Виччысьны (кодөс?) чойөс.*

Ловъя предмет петкөдлысь эмакывъяс босьтөны **-өс** суффикс: *кыйны (кодөс?) көинөс, көчөс*. Ловтөм эмакывлөн суффиксыс абу: *писькөдны (мый?) шор*.

Керан вежлөга морта суффиксыяс **-өс, -тө, -сө**: *батьөс, батьтө, батьсө*.

**Керанторья** вежлөг петкөдлө предмет, мый отсөгөн вөчөны действиесө: *вурны емөн, поткөдлыны черөн*. Вежлөг суффиксыс **-өн**.



**110 удж.** Лыдды. Аддзы да гиж текстсысь керан вежлөга эмакывъяссө кадакывъясыскөд. Сет юалөмъяс.

Лөдз, ном да геб сёрнитöны:

– Лөддзöй, кор тэ гортад мөдан?

– А ме Прокопей дырйиыс öбедайтa да гортö<sup>③</sup> муна<sup>④</sup>.

Ме йöзöс ог дöзмөд.

– Номйöй, а тэ кор?

– А ме Илля лунсö на виччысьла, öбедайтa дай сідзжö гортö мөдöдчa.

– Гебйöй, тэ кор мөдан?

– А ме ог на стöчa тöд. Виччысьла, кор сёркнисö босьтасны.

*Фольклорысь*



**Прокопей, Илля лун** – вичко да йöзкостса праздникъяс.

◆ Мый серти тöдмалін **сёркни** эмакывлысь вежлөгсö?



**111 удж.** Вежлав вежлөг серти **ном** эмакыв юалöмъяс сувтöдöмөн.



**Öтвывтан, торйöдан да могман вежлөгъяс.**

Кутшöм шөр вежöртасъясыс öтвывтан, торйöдан, могман вежлөгъяслөн?



Мый петкөдлө могман вежлөг?

Кутшöм вежлөгъяс паныд вежöртасаöсь?

**112 удж.** Вайöд сетöм кадакывъяс дорас öтвывтан, торйöдан да могман вежлөгa эмакывъяс.

<b>Öтвывтaн вeжлөг</b>	<i>Кодкөд? Мыйкөд?</i>	уджавны ..., иславны ..., зыксыны ... , сулавны ...
<b>Торйөдaн вeжлөг</b>	<i>Кодтөг? Мыйтөг?</i>	уджавны ..., овны ..., ветлыны ..., ворсны ...
<b>Могман вeжлөг</b>	<i>Кодла? Мыйла?</i>	судзөдчыны ..., нюжөд- чыны ..., копыртчыны ...

- ◆ Гиж артмөм кывтэчасъястө.
- ◆ Кадакыв сертиыс төдмав вeжөртассө эмакыв вeж-  
лөгъяслысь.
- ◆ Куим кывтэчасысь инды сюрөса кывсө × пасөн.


**Öтвывтaн** вeжлөг петкөдлө действие öтвыв  
вөчөм: *Бать дядькөд лэптө керка. Ми чойкөд ра-  
дейтам съывны.*

87

**Торйөдaн** вeжлөг петкөдлө предметтөг мыйкө  
керөм-вөчөм: *Дима ислалө бедьтөг.*

**Могман** вeжлөг петкөдлө керан-вөчан могсө:  
*Ме пета вала. Вок муно садйө чойла.*

**113 удж.** Лыдды. Аддзы да гиж текстсыс öтвывтaн  
вeжлөгa эмакывъяссө кадакывъясыскөд. Пукты юалөм.



### **Палалей олөмысь.**

Гожөмнас ме төдмаси корысь Матрен-  
лөн Кирик пиыскөд. Сыкөд ми сөйысь вө-  
чалім жыннъяс.

Кириклөн сэтшөм мичаось артмис-  
ны жыннъясыс! Пачын сотөм бөрын  
найө лөсыда тиньгисны. Макар Иван йө-  
рө ми вөчим зібъясысь көлөкөльня. Быд


асыв и рыт Кириккөд зильгим асланым жыннъясөн. Кык вежон чөж радпырысь кывзім мыла шыяс.



Регыд Макар Иваныд дөзмис наысь. Өти асылө воим йөрас, а жыннъясысь кольёмаоьсь торпыригьяс. Сэні жө туплясисны чегьялөм зібьяс. Ми Кириккөд дыр видзөдім жуглөм колясьяс вылө да бөрдім<sup>④</sup>.

*Каллистрат Жаков*

◆ Кывкөртөдав өтвывтан вежлөг вежөртас йылысь.

**114 удж.** Аддзы «Палалей олөмысь» текстсы да гиж керан, керанторъя, пыран, петан вежлөгьяса эмакывьяс-сө кадакывьясыскөд. Петкөдлы вежлөг суффиксыссө  пасөн. Инды вежлөгсө.



**115 удж.** Уськөд төд вылад да гиж став вежлөг суффикссө.



**Ина, петан да пыран вежлөгьяс.**

Мый висьталөны ас вежөртас йывсьыс вежлөг нимъясыс?



Кызди лөсялөны өта-мөдыскөд петан да пыран вежлөгьяс?

Кутшөм эмакывьяс оз овлыны ина да пыран вежлөгьясын?

**116 удж.** Лыдды. Аддзы пыран вежлөга эмакывьяс лөсялана кадакывьяскөд.

Мича еджыд бисерөн  
Парма ордым визирё  
Лымйыс пуксьö чöv.  
Кынмöm гöpъяс-шоръясö,  
Ыб вылö и боръясö  
Локтö еджыд тöv.

*А. Мишарина*

◆ Тöдмав шөр вежöртассö пыран вежлöга эмакывъ-  
яслысь.

◆ Гиж кывбурысь пыран вежлöга эмакывъяссö  
кадакывъясыскöд.

◆ Мый серти позьö тöдмавны вежлөгсö?

**Ина** вежлөг петкöдлö мыйкö керан-вöчан ин,  
места: *олö сиктын, узьö позйын, велöдчö школа-  
ын*. Вочавидзö *кодын? мыйын?* юалöмъяс вылö,  
суффиксыс **-ын**.

**Петан** вежлөг петкöдлö предметлысь мый-  
ыськö петöмсö, заводитчöмсö: *петны керкаысь,  
вöрысь, позйысь*. Вочавидзö *кодысь? мыйысь?*  
юалöмъяс вылö, суффиксыс **-ысь**.

**Пыран** вежлөг петкöдлö ловъя лов да предмет  
мыйкö пытшкö веськöдöm: *пырны керкаö*. Воча-  
видзö *кодö? мыйö?* юалöмъяс вылö, суффиксыс **-ö**.

**Куимнан** вежлөгас ёнджыкасö овлöны ловтöm  
предмет нимъяс. Ловъя лов нимъяс гежöда овлö-  
ны тайö вежлөгъясас.

**117 удж.** Гиж. Аддзы ина, петан, пыран вежлөгъяса  
эмакывъяс. Лöсялана кывъяссиянь сет на дорö юалöмъяс.

Менам чужанінын вöрыс пом ни дор. Вöрын кө юрид бергöдчас, верман вошны. Татчöс пармаын олöны писькöс йöз. Туйяс ни сикт-грездъяс матын абуöсь. Вошöмысь от-салö сöмын öти пас – Изъяю. Воöдчан кө сы берегö, ныр-визьтö колö кутны ю горулö. Уна верст чукльöдлöм бö-рын юыс петкöдас Веждім сиктö.

*В.Напалков серти*

◆ Вайöд матын вежöртаса кывъяс писькöс, петкöдас кывъяслы.

◆ Лыдды вöрын вошигөн петан туй корсьöм йы-лысь.

◆ Мый колö тöдны, вошан кө вöрын? Позьö-ö вöдит-чыны текстын сетöм индöдөн? Вöрысь петан кутшöм ин-дöдъяс нöшта тэ тöдан?

**118 удж.** Лöсьöд йöра да көр йылысь сетöм план сер-ти орччöдöмөн серпаса гижöд.

1. Йöра да көр – вöрса пемöсьяс.
2. Налөн ортсыса мыгöрын да оласногын öткодълун.
3. Пемöсьяслөн öта-мöдсьыс торъялöм.



Отсөг вылө кывъяс: *көрись ыджыдджык; кыдзи и көр; йөра моз жө; йөра серти; сідз жө, кыдзи и ...; торьялө йөраысь.*



**119 удж.** Гиж лөсялана эмакывъяс кадакывъяс до-  
рас, төдмав вежлөгсө.

Ола ..., веськөдчи ..., уськөдчим ..., мынтысьны ..., пов-  
ны ..., пöжавны ..., усьны ..., кисьтыны ..., узьны ... .

◆ Эмакывъяс дорө сувтөд юалөмъяс.



**Матыстчан, ылыстчан,  
вуджан да воан вежлөгъяс.**

Кутшөм кадакывъяскөд йитчөны матыстчан, ылыст-  
чан, вуджан, воан вежлөга эмакывъясыс?

?

Кутшөм вежлөгъяс ёнджыка лөсялөны ловъя эма-  
кывъяслы, кутшөмъяс – ловтөмлы?

Мый серти позьө төдмавны вежлөгсө?

**120 удж.** Лыдды сёрникузяяссө.

1. Водз асыв вотчысьяс мөдөдчисны **вөрлань.**

2. Чери кыйысьяс вель ёна нин ылыстчисны **тысянь.**

◆ Орччөд торйөдөм кывъяссө, төдмав налысь веж-  
лөгсө.

◆ Пасйы **вөрлань** да **тысянь** кывъяслысь кыв вежла-  
лан суффиксъяссө.

◆ Кывкөртөдав.



**Матыстчан** вежлөг петкөдлө предметлысь мөд предмет дорө локтөм, матыстчөм: *Бать пиыскөд матыстчисны бипурлань*. Вочавидзө *кодлань? мыйлань?* юалөмъяс вылө. Вежлөг суффиксыс **-лань**.

**Ылыстчан** вежлөг петкөдлө, мый предмет-ыс мөд дорсыс муно, мөдөдчө да ылыстчө: *Сикт-сянь мөдөдчим асывнас*. *Юркарсянь Визинө муним автобусөн*. Вочавидзө *кодсянь? мыйсянь?* юалөмъяс вылө. Вежлөг суффиксыс **-сянь**.

Матыстчан да ылыстчан вежлөгъяс паныд вежөртасаөсь.

**121 удж.** Лыдды гижөдсө колана суффиксыс содталөмөн. Төдмав эмакывъяслысь вежлөгсө да инды суффикссө.

Важөн Сыктывкар... Москва... ветывлісны төвся туй... вежонысь дыр. Өні Россия юркар... позьө воөдчыны самолөтөн, поездөн да машинаөн. Поезд да машина муноны тайө туйкостсө өти суткиөн. А самолөт лэбө өти час нелямын минутөн.

◆ Кадакыв серти төдмав вуджан да воан вежлөгъяслысь вежөртассө.

**122 удж.** Лыдды да гөгөрвоөд шусьөгъяссө.

1. Асывсянь лунтө эн ошкы. 2. Бикиньсянь ыджыд пөжар овлө.

◆ Инды ылыстчан вежлөга эмакывъяс да висьтав вежөртассө.



**Вуджан** вежлөг петкөдлө өти предметлысь мөд предмет пыр вуджөм, мунөм, прөйдитөм: *Ош мунөма ваөд*. Тайө вежлөгас овлоны сөмын ловтөм эмакывъяс. Вочавидзө *мыйөд? мыйти?* юалөмгъяс вылө. Вежлөг суффиксыс **-өд, -ти**.

**Воан** вежлөг петкөдлө өти предметлысь мөд предметөдз воөм, судзөдчөм: *Вөралысь локтис гортөдзыс пемыднас нин. Мач качис пөтөлөкөдз*. Вежлөг суффиксыс **-өдз**.



**123 удж.** Лыдды шусьөггъяссө да гөгөрвоөд найөс.



Кушөм шусьөггъяс оз лөсявны урок темалы?

1) Кывйыд Киевөдз вайөдас. 2) Телегатө дасыты төв-нас, а додьтө гожөмнас. 3) Гортсяньыд петигөн гортөдзыд локтөм йылысь мөвпышт. 4) Гортланьыд<sup>3</sup> туйыд кок-ныдджык.

◆ Кутшөм шусьөггъяс пырөмаөсь роч кывйысь? Мый серти позьө төдмавны?

◆ Гиж шусьөггъяссө. Төдмав эмакывъяслысь веж-лөггъяссө.

◆ Гөгөрвоөд вежлөг вежөртассө куим эмакывлысь.

◆ Кывкөртөдав матыстчан, ылыстчан, вуджан, воан вежлөггъяс йылысь.

◆ Мый серти позьө төдмавны вежлөгсө?



**124 удж.** Вайөд лөсялана кадакывъяс сетөм эма-кывъяс дорө. Сет на дорө юалөм да төдмав вежлөг-сө. Гиж кывтэчасьяссө.

Гортөдз ..., асывсяньыс ..., ключлань ..., гөпті ..., ордымөд ..., карсянь ..., зорөдлань ..., нюрөд ..., карөдз ... .

Отсөг кывъяс: *мөдөдчыны, локны, визувтны, восьлавны, ылыстчыны, матыстчыны, чеччавны, бөрынтьчыны, уськөдчыны, бергөдчыны.*

◆ Петкөдлы вежлөг суффиксө ☐ пасөн.

### КУТ ТӨД ВЫЛАД!

Эмакывлөн кыв вежлалан суффиксъяс да налөн вежөртасъяс:

1) уна лыда (-яс, -ян): *вокъяс, пиян;*

2) вежлөгалан (-лөн, -лысь, -лы, -өс, -өн, -көд, -төг, -ла, -ын, -ысь, -ө, -лань, -сянь, -өд, -өдз): *воклөн, воклысь, вокөс, вокль;*

3) асалан да индан (-өй, -ыд, -ыс): *мамөй, мамыд, мамыс.*

Эмакыв артмөдан суффиксъясөн лооны:

-өм: ворс-ны → ворсөм

-ысь: велөд-ны → велөдысь

-ан (-ян): ю-ны → юан, пывсь-ыны → пывсян

-тор: чөскыд → чөскыдтор

-ин (-ін): ытшкөм → ытшкөмин, кос → косін

-өд: гиж-ны → гижөд, пасй-ыны → пасйөд

-өс: кыйны → кыйдөс, вотны → вотөс

-ас(-яс): быдтыны → быдтас, ломтыны → ломтас, пуктыны → пуктас, кольны → коляс

## НИМВЕЖТАС



### Первой, мөд да коймөд морта өтка да уна лыда нимвежтасъяс.

?

Мый сийө нимвежтасыс? Мыйла тайө кывсикассө сідзи шуоны?

Мыйла колөны нимвежтасъяс?

Мый сийө морта нимвежтасыс?

**125 удж.** Лыдды. Чутъяс местаө содты колана нимвежтасъяс да гиж.

1. ... лыддя Е.В. Рочевлысь «Митрук петө тундраысь» повесът. 2. Кытысь ... төдмалін «Эзысь борд» конкурс йывсьыс? 3. Чойлы 14 арөс. ... ветлөдлө «Киподтуя нывъяс» кружокө.

◆ Кыдзи тэ төдмалін нимвежтаслысь мортсө?

**126 удж.** Лыдды 1, 2, 3 морта нимвежтасъяслысь лыд серти вежласьөм.

**Морта нимвежтасъяслөн лыд серти вежласьөм.**

	Өтка лыд	Уна лыд
1 морт	Ме велөдча.	Ми велөдчам.
2 морт	Тэ велөдчан.	Ті велөдчаннуд.
3 морт	Сийө велөдчө.	Найө велөдчөны.

◆ Кывкөртөдав өтка да уна лыда нимвежтасъяс йылысь.

**Морта нимвежтасыс** куим сикас: первой, мөд да коймөд морта.

Первой морта нимвежтас индө сёрнитысь былө. Мөд морта нимвежтас индө висьталысьлөн вомгёрт былө. Коймөд морта нимвежтас индө морт былө, коді абу сёрнитысьяс пөвстын.

*Ме велөдча нельөд классын, а кутшөмын тэ велөдчан? Менам эм вок. Сійө велөдчө сизимөд классын. Ми олам сиктын. Ті ветлінныд карө? Найө дасьтысьөны праздник кежлө.*

Нимвежтаслысь мортсө позьө сідзжө төдмавны кадакыв форма серти.

Морта нимвежтасьяс овлөны өтка да уна лыда: **ме – ми, тэ – ті, сійө – найө.**

**127 удж.** Лыдды гижөдсө. Төдчөдөм нимвежтасьяслысь төдмав лыд да морт.

Гожомнас ме батькөд ветлі Войвыв Уралө. **Ми** веськалім Маньпупунёр из гөра былө. Тані зымвидзисны избагатырьяс.

Кыкнанным шемөсмөмөн видзөдалім сизим дивө-изьяссө. Быд из аслыспөлөс. Öти из – быттьө былө лэптөм кияса тун. **Сійө** сюся видзө мукөд изсө. Мөд изйыс кузь платтьөа нывбаба кодь. Со сулалө олөма пөль-из. Сылөн чужөм вылас весиг чукурыс тыдалө. Орччөн сулалысьыс – маличаа войвыв морт.

Меным сьөлөмө йиджисны радөн сулалысь Маньпупунёр дивө-изьясыс. **Найө** артмөмаөсь уна сюрс во чөж. **Тэ** кө видзөдлан<sup>①</sup> изьяссө<sup>③</sup> өтарсянныс, аддзан аслыспөлөс йөзөс. Мөдарласянныс видзөдігөн изьясыс пемөсьяс да повзьөдчысьяс кодьөсь.

Тайо чуймодана серпассо аддзылом бөрүн мянлы лои гогөрвоана: Маньпупунёр збыль вөр-валон дивө.



◆ Серпас дінас бөрйы лөсялана юрним: *Маньпупунёр из гора. Маньпупунёр дивө-изъяс. Изйысь шензьодана артмөмторъяс. Сизим из-багатыр. Чуймодана серпас. Вөр-валон дивө.*

◆ А мый тэ тодан Маньпупунёр йылысь?

◆ Аддзы вежлөга эмакывъяссө да гиж найос. Төдмав вежлөгсө.



**128 удж.** Лыдды, чутъяс пыдди гиж колана нимвежтасъяс. Пасйы нимвежтасъяссө, инды лыд да морт.

1. Төвся каникулъяс дырйи ... ветлі походө. Төвся каникулъяс дырйи ... ветлім походө. 2. «... бура серпасасян», – ошкис велөдысь. «... бура серпасасянный», – ошкис велөдысь. 3. ... велөдчө нельөд классын. ... велөдчөны нельөд классын.



## Öтка лыда морта нимвежтасъяслөн вежлөг серти вежласьом.

129 удж. Лыдды таблицасö. Инды нимвежтасъяслысь вежлөг суффиксъяссö.

### Öтка лыда морта нимвежтасъяслөн вежлөг серти вежласьом.

Вежлөг ним	Юалөмгъяс	1 морт	2 морт	3 морт
1. Нимтан	<i>кодi?</i>	ме	тэ	сiйö
2. Асалан	<i>кодлөн?</i>	менам	тэнад	сылөн
3. Босьтан	<i>кодлысь?</i>	менсьым	тэнсьыд	сылысь
4. Сетан	<i>кодлы?</i>	меным	тэныд	сылы
5. Керан	<i>кодöс?</i>	менö	тэнö	сiйöс
6. Керанторъя	<i>кодөн?</i>	меөн	тэөн	сыөн
7. Öтвывтан	<i>кодкөд?</i>	мекөд	тэкөд	сыкөд
8. Торйöдан	<i>кодтөг?</i>	метөг	тэтөг	сытөг
9. Могман	<i>кодла?</i>	мела	тэла	сыла
10. Ина	<i>кодын?</i>	меын	тэын	сыын
11. Петан	<i>кодысь?</i>	меысь	тэысь	сыысь
12. Пыран	<i>кодö?</i>	—	—	—
13. Матыстчан	<i>кодлань?</i>	мелань	тэлань	сылань
14. Ылыстчан	<i>кодсянь?</i>	месянь	тэсянь	сысянь
15. Вуджан	<i>кодтi?</i>	—	—	—
16. Воан	<i>кодöдз?</i>	меöдз	тэöдз	сыöдз

130 удж. Юалөмгъяс серти гиж ме, тэ морта нимвеж-  
тасъяс лөсялана вежлөгын.

Ёртасъны (кодкөд?) ... . Нуөдны (кодөс?) ... . Висьтав-  
ны (кодлы?) ... . Карандашыс (кодлөн?) ... . Корны (код-  
лысь?) ... . Матыстчыны (кодлань?) ... . Өтдортчыны (код-  
ысь?) ... .

131 удж. Лыдды текстсө. Гиж нимвежтаса сёрнику-  
зяяссө. Төдмав нимвежтасъясылысь морт да вежлөг.

### Нёримё дедё.

Паныд котөртө көчиль.  
КӨЧ. Нёримё дедё, кытчө муна?  
Пуксьөд менё додяд,  
Ме тэныд сыланкыв сыла.  
НЁРИМЁ. Муна ме карё,  
Өш вузавны базарё.  
Менам додълөн заветкаыс зэв омоль,  
Гашкё, и чегас.  
КӨЧ. Ме зэв кокныдик, сөмын лы да ку.  
Ме тэныд сыланкыв кута сывны.  
Кыкнад век нин гажаджык.  
КӨЧ (пуксьө да сылө):  
Та-ра-ра, ту-ру-ру,  
Өшкөй менё карөдз ну.  
Некор ме эг аддзыв кар,  
Ог төд, мыйсяма базар.  
Ту-ру-ру, та-ра-ра,  
Кокөс шойчөда бура.

*Н. Щукин*



**Нёримö** – фольклор гижöдысь геройлөн ним.  
**Заветка** – додь вожсö доддяс йитан гез либö ньöр.

◆ Аддзы текстысь вежлöг суффикса эмакывъяс.

**132 удж.** Лöсьöд дыш, пöръяссысь Нёримöлысь ручкöд либö ошкöд морта-морт сёрни. Висьтав класс водзын.



**133 удж.** Дасыты ёртыдкöд нимвежтасъяс пыртöмөн



кöч йылысь мойд да петкöдлы класс водзын.



**134 удж.** Вайöд сетöм нимвежтасъяс дорö сийö жö вежлöгъясын морта нимвежтасъяс. Гөгöрвоод ассыд содтöдъястö.

1 морт  
менö

...

...

2 морт

...

тэныд

...

3 морт

...

...

сыкöд

◆ Петкöдлы вежлöг суффиксыссö  пасөн.



**Уна лыда морта нимвежтасъяслөн  
вежлöг серти вежласьöм.**



Кыдзи тöдмавны уна лыда нимвежтасъяслысь веж-  
лöгсö?

**135 удж.** Лыдды таблицасö. Босьт юрвежад уна лыда морта нимвежтасъяслысь вежлöг серти вежласьöмсö.

**Уна лыда морта нимвежтасъяслөн вежлөг серти  
вежласьом.**

<b>Вежлөг нимьяс</b>	<b>1 морт</b>	<b>2 морт</b>	<b>3 морт</b>
1. Нимтан	ми	ті	найӧ
2. Асалан	миян	тіян	налӧн
3. Босьтан	миянлысь	тіянлысь	налысь
4. Сетан	миянлы	тіянлы	налы
5. Керан	миянӧс	тіянӧс	найӧс
6. Керанторъя	миянӧн	тіянӧн	наӧн
7. Ӗтвывтан	миянкӧд	тіянкӧд	накӧд
8. Торйӧдан	миянтӧг	тіянтӧг	натӧг
9. Могман	миянла	тіянла	нала
10. Ина	миянын	тіянын	наын
11. Петан	миянысь	тіянысь	наысь
12. Пыран	миянӧ	тіянӧ	найӧӧ, наӧ
13. Матыстчан	миянлань	тіянлань	налань
14. Ылыстчан	миянсянь	тіянсянь	насянь
15. Вуджан	миянті	тіянті	—
16. Воан	миянӧдз	тіянӧдз	наӧдз

**136 удж.** Тӧдмав нимвежтасъяслысь морт, лыд да вежлӧг.


Ворсім накӧд, адзылі тіянӧс, котӧрта тэлань, тӧдіс миянӧс, висьтала тэныд, бергӧдчы мелань, велӧдчы менсьым, локтӧ сылань, кывлыны сысянь, отсышт меным, чолӧмав сійӧс.

◆ Кызди тӧдмавны уна лыда нимвежтаслысь вежлӧгсӧ?

### Важ вöралан календар.

Важ комияс овлöмаöсь вөр-ваыскöд топыд йитöдын. Найö воыдлысь кадсö лыддывлöмаöсь ас ногөн. Налөн вöлöма аслыссияма календар.

Öнiя кадö календарын индöма дас кык тöлысь. А важөн ставыс вöлöма во чöжнас öкмыс кадколаст. Важ календарсö кисьтлöмаöсь бронзаысь. Плавкöс кытшыслысь шöрсö перйöмаöсь. Сэтчö серпасалöма öкмыс пемöсöс: ош, көр, сьöдбöж, сан, йöра, вурд, руч, ур да тулан. Налысь олöмсö кыйсьысьыд некор абу торклöма, абу вөрзьöдлывлöма ичöt пияна звер-пöткатö.



Тiяны бура тöдса, мый воыс заводитчö январ тöлысянь. А важөн кадсö заводитлöмаöсь лыддыны тувсов шондi бергöдчöмсянь. Тайö каднас буретш пиянасьö ош. Сийö петö гусыс. Заводитчö выль олöм.

Важ календар серти бура тыдалö войвывса йöзлөн вöрса пемöслысь оланногсö тöдöмыс да колана кадö найöс кыйöмыс.

◆ Аддзы морта нимвежтасьяс, тöдмав налысь морт, лыд да вежлög.

138 удж. Лыдды текстсö. Аддзы нимвежтасөн вö-  
дитчöмын тырмытöмтор.

### Кöдзыд дырйи.

Ывлаын кöдзыд, пашляк лыйсьö. Ми<sup>3</sup> луннас кыкысь  
ломтам пач. Бать судзöдö паччöрысь сямöд да суйö сi-  
йöс<sup>3</sup> пачö. Кос пес недыр мысти öзйö. Сийö пöдлалö пач  
öдзöссö. Би нöшта на ёнджыка ышмö да гажаммö.

- ◆ Содты да гиж текстлысь помсö.
- ◆ Тöдмав, паськыд али векныйд текстлөн темаыс.

139 удж. Лыдды.

Морта нимвежтасъяс чужöмаöсь зэв важөн. Найö лоö-  
маöсь финн-угор кывъя йöз öтув олгөн на. Талун морта  
нимвежтасъяс неуна торъялöны нин шыяснас. **Ме** ним-  
вежтас финн да эст кывйын лоö мина, венгр кывйын – **ин**,  
удмурт кывйын – **мон**. **Тэ** нимвежтас финнъяслөн **сiна**,  
венгр кывйын – **тэ**, удмурт кывйын – **тон**. А öд тайö öтув  
кадколастыс вöлöма квайт либö унджык сюрс во сайын!



140 удж. Артмöд да гиж **ми**, **тi**, **найö** нимвежтасъяс  
колана вежлöгын. Инды вежлöгсö.

1. Сетны (ми, тi, найö) – босьтны (ми, тi, найö).
2. Матыстчыны ... – ылыстчыны ... .
3. Петны ... – пырны... .



*Сетны миянлы, тiянлы, налы. С.в. – ...*

## КАДАКЫВ



### Кадакывлөн лыд да морт серти вежласьом.

Мый сійө кадакывйыс?



Кыдзи вежласьө кадакыв?

Кыдзи төдмавны кадакывлысь лыд да морт?

**141 удж.** Лыдды таблицасө. Висьтав, кыдзи вежласьө кадакыв.

ме	<i>МЫЙ ВӨЧИ?</i>	уджалі
тэ	<i>МЫЙ ВӨЧИН?</i>	уджалін
сійө	<i>МЫЙ ВӨЧИС?</i>	уджаліс
ми	<i>МЫЙ ВӨЧИМ?</i>	уджалім
ті	<i>МЫЙ ВӨЧИННЫД?</i>	уджалінныд
найө	<i>МЫЙ ВӨЧИСНЫ?</i>	уджалісны



Кадакыв вежласьө лыд да морт серти: *ме локті – ми локтім, тэ локтін – ті локтінныд, сійө локтіс – найө локтісны.*

Колян када кадакывйын гижсьө и (-і), а оз ы: *локті, вайи.*

**142 удж.** Лыдды. Мый тэ төдан съод утка йылысь?

Бокыс еджыд, ставнас съод.

Утка сійө. Кутшөм – төд.

Лунө лэбө медся бөрын,

Лым нин овлө сэки вөрын.


*В. Лодыгин*

◆ Ворсыштам!

Артмөд лэб- кыввужъя мөд морта уна лыда колян  
када кадакыв. Лөсьөд сёрникузя.

143 удж. Төдмав кроссвордсö да лыдды кывсö.

1. Кывсикас.
2. Кывлөн медтөдчана юкөн, кодi кутö öтвужъя кывъяслысь шөр вежөртассö.
3. Вежөртас да грамматика боксянь йитчөм кык кыв.
4. Сёрникузяын сюрöса юкөд.
5. Кывлөн юкөн, кодöс төдмалöны гласнöй шы лыд серти.
6. Шуанног серти сёрникузя сикас.



Кадакывлөн кывпод вочавидзö *мый керны?*  
*мый вöчны?* юалөмъяс вылö. Кывпод оз петкөдлы  
ни морт, ни лыд, ни кад. Найöс петкөдлысь суф-  
фиксъясөн лоöны **-ны** да **-ыны**: *вайны, пуктыны.*



**144 удж.** Лыдды. Гиж кадакывъяссö. Инды морта да лыда формасö.

### **Тöлын уткаяс.**

Öти төвся лунö **восьлалі** ты пöлөн. **Видзöдi** гөгөр. Не-  
ылын тыдаліс восьсаин. Сэтысь петіс тшын кодь ру да ды-  
шника руньгис лымйөн вевттысьсöм берег пöлөн.

Друг восьса рыысь кыпöдчисны уткаяс да öдйö **во-  
шисны** бадь кустъяс сайö. Меным окота вöлі выльысь  
видзöдлыны повтöм лэбачъяс вылö. Но уткаяс лöня **пу-  
калісны** дзебасын.

*И.Коданёв серти*

- ◆ Кызди төвйöмаось уткаяс?
- ◆ Коймöд морта кадакывъясслысь торйöд морт петкöд-  
лысь суффиксъяссö  $\triangle$  пасөн.
- ◆ Сувтöд тöдчöдöм кадакывъяссö кывпод формаö.
- ◆ Инды уна лыда суффикс **кыпöдчисны, вошисны**  
кадакывъясслысь.

☺ 145 удж. Лыдды. Торйөдөм кадакывъяссö сувтөд  
☺ öткa лыдö да гиж.

Тi, донa уткаяс, төвбыд **олінныд** тыас. Көдзыд каднас  
тi дзебясинныд турун зорөдъясын да лым пытшкын. Сө-  
мын регыдик кeжлö **петавліныд** сөйыштны восьса рыö.

☞ Тэ, донa утка, төвбыд ...


146 удж. 145-өд уджын сетөм кадакывъяссö сувтөд  
уна лыда 1 морта формаö. Лыдды, мый артмис.

◆ Кызди тэ тайöс вöчин?

147 удж. Кывбур да серпас серти лөсьöд утка йылысь  
текст-серпас.

Сылі абу ёна кузь,  
Синъяс улысь вошны сюсь.  
Медся топыд сылөн гöныс,  
Оз и овлы кынмылöмыс.

*В.Лодыгин*



☞ 148 удж. Гиж колян када кадакывъяс 1, 2, 3 мор-  
тын öткa да уна лыдын.

Кылі, сувтi.

☞ *Ме восьлалi, тэ восьлалiн, сiйö восьлалiс; ми восьла-  
лiм, тi восьлалiнныд, найö восьлалiсны.*



## Кадакывлөн кад серти вежласьём.



Кызди төдмавны кадакывлысь кадсө?

**149 удж.** Лыдды таблицасө. Висьтав кадакывлөн кад серти вежласьём йылысь.

<b>Өнія кад</b>		
	Өтка лыд	Уна лыд
1 морт	Ме муна.	Ми мунам.
2 морт	Тэ мунан.	Ті мунаннды.
3 морт	Сійё мунё.	Найё мунёны.
<b>Локтан кад</b>		
1 морт	Ме муна.	Ми мунам.
2 морт	Тэ мунан.	Ті мунаннды.
3 морт	Сійё мунас.	Найё мунасны.
<b>Колян кад</b>		
1 морт	Ме муні.	Ми мунім.
2 морт	Тэ мунін.	Ті муніннды.
3 морт	Сійё муніс.	Найё мунісны.

◆ Вөч кывкөртөд кадакывлөн лыд да кад серти вежласьём йылысь.

**150 удж.** Лыдды. Инды кадакывъяссө да сувтөд на дорё юалөмъяс.

### **Пөсь нянь.**

Миша ньөбис пөсь нянь. А кутшөм чөскыд няньыслөн<sup>②</sup> көрыс! Сійё дзебис няньсө пальто пөла улас, чепөс-йис ывлаө да котөрөн мөдөдчис гортас.

Зонка мыччис небыд да пось нянь тупосьсё мамыслы. Детинкалы окота вöлі чöсмöдлыштны тöдса пышкайясöс. Миша вундiс öти шөрöм да уйкнитiс ывлаö<sup>3</sup>.

Детинкаöс дзик пыр кытшалiсны пышкайяс. Сы до-рын медся зiля кокасисны кык пышкой. Прошка да Гош-ка пöт кынöмөн аски пасъясны Виль во.

*Е.Габова серти*

- ◆ Висьтав, кызди тэ отсалан лэбачьяслы тöлын.
- ◆ Корсь кадакывъяс, вайöд кывподъяс. Тöдмав када-кывъяслысь лыд да кад.
- ◆ Кызди тэ тöдмалан кадакывлысь кадсö?



**Ньöбис** — кывпод – ньöбны. **Ньöбис** сулалö öтка лыдын, колян кадын.



**151 удж.** Гиж. Чутъяс пыдди содтав лöсялана када-кывъяс.

Коля да Петя ... лэбач сёянiн. Найö ... сiйöс öшинь весьтö. Зонкаяс ... сэтчö нянь пыриг. Пыстаяс да жоньяс быд лун ... сэни.

Отсөг кывъяс: *өшөд...сны, пажнайт...сны, лөс...өд-...сны, крошит...сны.*



**152 удж.** Артмөд кывъясысь сёрникузяяс, лөсьөд висьт да юрнимав сійөс.

тшыгъялөны, төвйысь, войвылын, лэбачьяс  
сёян, найө, төлын, корсьоны, көдзыд  
лэбачьяс, төждысьоны, тшыг, челядь, вöсна  
вöчисны, найө, борда, сёянін, ёртъяслы  
пöся, лэбачьяс, челядьöс, аттьöалисны



### **Кадакывлөн морт серти вежласьём да морта суффиксьяс.**



Кыдзи төдмавны кадакывлысь мортсö?

Кутшөм кыв вежлалан суффиксьяс индöны 1, 2 да 3 морт вылө?

**153 удж.** Лыдды 149-өд уджын сетөм таблица да висьтав кадакывлөн морт серти вежласьём йылысь.

**154 удж.** Лыдды кадакывъяссö. Төдмась öнiя, локтан да колян кадлөн морта суффиксьясөн. Кывкөртöдав.

	Öнiя кад	Локтан кад	Колян кад
1 морт	кыл-а	кыл-а	кыл-і
2 морт	кыла-н	кыла-н	кылі-н
3 морт	кыл-ö	кыла-с	кылі-с



Кадакыв вежласьö морт серти. Овлöны 1, 2 да 3 морта кадакывъяс. Мортсö петкöдлöны 1, 2, 3 морта кыв вежлалан суффиксъяс.

1 морт: -а, -а, -і;                      2 морт: -н, -н, -н;  
3 морт: -ö, -с, -с.

Кадакывлысь мортсö тöдмавны отсалöны 1, 2, 3 морта нимвежтасъяс: (ме) муна, (тэ) мунан, (сійö) мунас.

**155 удж.** Вежлав тöдны кадакыв таблица вылö видзöдöмön. Пасйы кыв вежлалан морта суффиксъяс.

**156 удж.** Лыдды висьтсö.

**Тöвся кыдзьяс дорын.**  
(Пöльлön висьт.)

Öтчыд муна лызьöн кыдзьяс дорті раслань. Чöв-лөнъ. Сöмын трачкакылö кöдзыдыс. Нимкодьяся мичлуннас.

Друг кыдз тай жбыр-жбор кысянькö кыліс. Ме гөгөр кыптис лым бус. Копыртчи да здук-мöд виччыси. Бöрын-джык ставсö гөгөрвои. Лызьнад ме повзьöдi репасын узыысь таръястö. Найö öд ув вывсяньыс, вöлөмкö, дзумгысьöны вой кежлас лым пиö да асылöдзыс узыöны сәні.



**Репас** – лымйын сьöла-тарлön узыланін.

◆ Текстысь аддзы кадакывъяс да гиж. Инды налысь лыд, кад да морт.

◆ Инды кадакывъяслысь морта суффиксъяс.

◆ Аддзы текстысь серпасалан кывъяс.

◆ Вайöд öтвужъя кывъяс **узыысь** кывлы.

## 157 удж. Лыдды гижодсө.

Водзын тыдовтчис паськыд эрд. Шуйга бокын вöли кыддза рас. **Кыз вылас** пукалісны таръяс. Найö кокалісны кыз пу гарьяссö. Ме видзöді вель дыр.

Недыр мысти öти тар друг лэбис. Сійö пуксис эрд вылас да **воши**. Сы бöрся мöд, коймöд. Пу вылö некод эз коль. **Бытьö** сэнi некод эз и вöвлы.

Ёна кöдзыд дырйи таръяс пырöны лым пиö, репасö. Ме пыр жö гөгөрвои, мый поводдяыс аски лёкмас.

*С.Раевский серти*



- ◆ Тöдчöдöм кывъяслысь гөгөрвоöd гижанногсö.
- ◆ Инды гижöдысь 3 морта колян када кадакывъяс.
- ◆ Висьтав, мый серти гижысьыс тöдмаліс поводдя лёкмöм йылысь?



**158 удж.** Бөрйы сетöм кывъяссыйс матын вежöртаса кадакывъяс. Гиж найöс öнiя када 1 морта вылö вежлалöмөн.

Вильшасис, вötöдіс, скöрмис, дзевсис, тöждысис, вевтис, ышмис, майшасис, тупкис, дöзмис, саяліс, сүöдіс.



*Вильшася – ышма.*



## Соссяна кадакывъяс.

?

Мый петкөдлө соссяна кадакыв?

Кыдзи артмөны соссяна кадакывъяс?

Кыдзи вежласьоны соссяна кадакывъяс?

159 удж. Лыдды таблицасө.

<b>Өнiя кад</b>		
	<b>Өтка лыд</b>	<b>Уна лыд</b>
1 морт	Ме ог гиж.	Ми огө гижөй.
2 морт	Тэ он гиж.	Тi онө гижөй.
3 морт	Сiйө оз гиж.	Найө оз гижны.
<b>Локтан кад</b>		
1 морт	Ме ог гиж.	Ми огө гижөй.
2 морт	Тэ он гиж.	Тi онө гижөй.
3 морт	Сiйө оз гиж.	Найө оз гижны.
<b>Колян кад</b>		
1 морт	Ме эг гиж.	Ми эгө гижөй.
2 морт	Тэ эн гиж.	Тi энө гижөй.
3 морт	Сiйө эз гиж.	Найө эз гижны.

◆ Орччөд өнiя да локтан када соссяна кадакывъяс, кывкөртөдав.

◆ Орччөд өтка да уна лыда соссяна кадакывъяс, вöч кывкөртөд.

Соссяна кадакывъяс петкӧдлӧны мый оз вӧч-  
сьы, действиыс оз ло вӧчӧма, эз ло вӧчӧма.

Соссяна кадакыв артмӧ соссяна **ог, он, оз, эг,  
эн, эз** кывъясыс да вежласьтӧм кадакывйыс: **ог  
мун, он мун, оз мун, эг мун, эн мун, эз мун**. Веж-  
ласьӧ сӧмын соссяна кывйыс.

Соссяна кывъясыс вежласьӧны лыд, морт да  
кад серти.



**160 удж.** Лыдды. Аддзы да гиж соссяна кадакывъ-  
яс.

### **Вӧралысьлӧн паськӧм.**

Коми вӧралысьлӧн лаз –  
чуймӧдана паськӧм. Вӧра-  
лысьыдлы таыс бур пась-  
кӧмыс оз сюр. Лунся прӧ-  
мыстӧ да сӧянтӧ позьӧ пук-  
тыны, ньӧти оз мешайт. Вӧ-  
ралысьӧс зӧрыс и слӧт-  
ыс видзӧ, некор оз кӧтась  
пельпомыд да мышкыд.  
Лӧсьыда вӧнявсьӧ, оз дӧз-  
мӧдны тӧвъяс. Пуксыл-  
лан кӧ шойччыны, дыр оз  
мӧрччы ыркыдыс.

*Е.Рочев серти*



◆ Мый петкӧдлӧны сос-  
сяна кадакывъясыс?

- ◆ Төдмав соссяна кадакывъяслысь лыд, морт да кад.
- ◆ Висьтав, кызди гижöма кадакывъяскöд оз кыв?

**161 удж.** Лыдды текстсö. Скобкаын сетöм кадакывъяссö вежлав да сувтöд колян када öтка либö уна лыдö.

### Батьлөн лаз.

Талун Митя медводдзаясь öтнас муно пармаö<sup>④</sup>. Асывнас батысь (перйыны) чуланясь ассьыс лазсö да (сетны) пиыслы.

Лазыйсь вöли йöра кучикысь вöсна дубитöма да йиджтöдöма-мавтöма дьöгöдьöн, кокни, оз кöтась. Бöрас эм чер öшöдны волыс. Водзас и бöрас гырысь зепъяс вöчöма, кытчö вöралысь пуктö кыйдöссö.

Митяös (колльöдны) мамыс да батысь. Батысь (öшöдны) лаз мышкас чер. Мамыс лаз зептö<sup>②</sup> (пуктыны) сёян тыра тубрас. Дыр на мам-батысь (сулавны) кильчö дорас да (видзöдны), кытчöдз вöралысьлөн лазъя ичöтик мыгöрысь эз саймовтчы туй чукыль сайö.

*В.Баталов серти*

- ◆ Аддзы да гиж соссяна кывъяса кадакывъяс, төдмав налысь лыд, морт да кад.

- ◆ Лöсьöд текстыслы план да висьтав ас кывйöн.



**162 удж.** Лыдды. Лöсьöд кывъяссьыс сёрникузяяс да гиж.

нэм чöж, вöралысьöс, мудзтöдö, да, парма-вөр, шойччöдö

вежöрсö, вöтлысьöм, ёсьтö, звер бöрся, сылысь

вöсна, тöждысьö, ёртыс, вöралысь  
оз босът, некор, мöд, прöмыс, сійö, вöралысьлысь  
мынтöдö, зверöс, да, кыйсьысь, тыдаланаинö, налькйö  
шедöм, лэптö  
век, ломтас, туйвывса, да, вөр керкаын, эм, мортлы,  
сёян-юан



### Соссяна кадакывъяс гижанног.

?

Кыдзи гижсьöны кадакывъяскöд **ог, он, оз, эг, эн, эз,**  
**абу соссяна кывъяс?**  
Кутшöм шыпас гижсьö соссяна кадакывъясын?

163 удж. Лыдды мойдсö.

#### Колö аслыд заптысьны.

Туй кузя котöртіс Ур. Аддзис пирöг. Думыштіс сійöс  
тöв кежлö косьтыны. Öшöдіс<sup>3</sup> пирöгтö томиник пожöм  
йылö.

Мунö туй кузя Кöин. Казяліс сійö пöжастö, чеччыш-  
тіс, но пирöгöдз эз судз. Кавшасис мыр вылö да нюжöд-  
чис пирöгла, бара на эз **вермы** судзöдны. Котöртіс мöд  
мырла. Кöиныйд кык мыр вывсаень кутіс судзöдчыны.

Друг кыськö Ур чеччыштіс, кватитіс пирöгтö да ас-  
лас позйö пыртіс<sup>4</sup>. Пожöм горссянь мыччысьліс Урыд  
да эльтыштіс Кöинöс:

– **Эн горшась** дась нянь вылö. Колö аслыд заптысь-  
ны!

*С.Пылаева*

◆ Кадакывъяс дорö сувтöд юалöм.

- ◆ Гөгөрвоод төдчөдөм кадакывъяслысь гижанногсө.
- ◆ Корсь мойдысь колян када кадакывъяс. Инды налысь морта суффиксъяссө.



**Ог, он, оз, эг, эн, эз, абу** кывъяс кадакывъяскөд гижсьоны торйөн: **ог торкав, он вунөд, оз лөгав.**

**Эг, эн, эз** кывъясын колө гижны э, а оз и: **эн вунөд, эг эшты, эз ветлы.**

**164 удж.** Кадакывъяс содталөмөн гиж шусьөгъяссө да гөгөрвоод налысь вежөртассө.

1. Сетөм кывтө ... . 2. Ва паньд ачыс пыжыд ... .  
3. Киссьөм ватө ... . 4. Көръясөс нитш корсьны... 5. Вурд да пон өтлаын ... . 6. Паччөртө пөжөмысь кынөмыд ... .

Отсөг кывъяс: *он курышт, оз велөдны, оз пөт, эн вудж, оз овны, оз кат.*

**165 удж.** «Колө аслыд заптысьны» мойдысь бөрйы лөсялана кывъяс да гиж кывтэчасъяссө.

Аддзис (*мый?*)..., эз судз (*мыйөдз?*) ..., нюжөдчис (*мыйла?*) ..., кватитіс (*мый?*) ..., эльтыштіс (*кодөс?*) ... .

- ◆ Кыдзи йитчөма кадакывйыс эмакывйыскөд?
- ◆ Төдмав эмакыв вежлөгъяссө.



Кутшөм шыпас гижсьө соссяна кадакывйын кывдін бөрас?



**166 удж.** Лыдды да орчөд кадакывъяссө.

Ме лыдди.	Ме эг лыдды.
Тэ лыддин.	Тэ эн лыдды.
Сійө лыддис.	Сійө эз лыдды.

◆ Мыйөн торъялөны первой да мөд столбикса кадакывъясыс?

◆ Кутшөм шыпас гижсьө кадакывйын кывдін бөрас?



Соссяна кадакывъясын гижсьө **ы**, а оз **и**: *ог лыдды, оз воы, эз видзөдлы.*

**167 удж.** Лыдды приметаяссө. Гиж соссяна кадакывъяссө.

1. Уна льөм дзоридз – чөд лоө, а төлыс кө дзоридзсө нуас, чөд оз ло. 2. Тулыснад вежон зэрас, да лунөн косьмас, арнад лун зэрас, да вежон оз косьмы. 3. Гыма зэрыд дыр оз зэр<sup>④</sup>.



**168 удж.** Лыдды нөдкывъяссө да төдмав. Гиж кола-на шыпасъяс содталөмөн.

1. Сизимдас платтьө новлө, а кизь оз овл... . 2. Нель кока пышйө, кык кока вөтчө, а суюдны оз верм... . 3. Биын оз сотч..., ваын оз вөй. 4. Кык вок пышйөны, өта-мөднысө оз кольн... .



## Кадакыв кыввужйын Й шыпас.



Кызди тӧдмавны кадакыв кыввужйын й шыпас гижӧм?

169 удж. Лыдды да орчӧд кык зонкалысь гижӧм сӧрникузяяс.

Ӧльӧксан: Вӧралысь кыйис сьӧлаӧс.  
Дима: Вӧралысь кыис сьӧлаӧс.

◆ Коді зонкаяс пиысь гижис ӧшыбкатӧг да мыйла?



Кыввужйыс кӧ помасьӧ й-ӧн, гижсьӧ й шыпас:  
*кый-ны – кыйис, вай-ны – вайис.*

Кыввужйын кӧ абу й-ыс, сӧки й шыпас оз гиж-  
сьы: *кы-ны – кыис (кепысь); во-ны – воис.*

170 удж. Лыдды кывъяссӧ да видлав кывтӧчас сер-  
ти.

Вайис, сӧйис, кыйис, сӧйис, койис, лыйис, уйис.

◆ Мӧвпышт да висътав, мыйла сетӧм кывъясын  
гижсьӧ й.



171 удж. Тӧдмав да лыдды кывтӧчас.



1, ~~2~~, 3 УН  
У



1, 2, ~~3~~  
П



~~1~~, 2, 3, 4



### Вурун кепысь кыан удж.

Пöчыс Ванялы кыис вурун кепысь. Зонка панöм-сяньыс помöдзыс аддзыліс, кызди артмö вурун кепысьыс.

Ванялөн вежаньыс вайис вурун. Медводз пöчыс нис-тіс вурунсö. Сэссия некымын лун печкис. Вурунысь арт-мис шöрт. Шöртсö путшкис да гартліс некымын ту-пыльö. Тайöс вöчöм бöрын босьтчис кепысь кыан уджö.

Пöчыс тэрыба вөрöдіс витнан югыз емнас, пелька пысавліс петляяс. Гөрд серъяса кыаныс вочасөн содіс. Ваньö сюся<sup>①</sup> видзöдіс бабыслысь уджсö<sup>④</sup>.

Пев туйöдзыс воём мысти зонка сүйліс кепысяс ки-сö. Сы бöрын пöчыс певъяліс кепысьсö. Öні Ваня гөгөр-воис, кутшöм сьöкызд вөлöма кепысь кыан уджызд.

– Ивук, со и дась лоис кепысьызд, – меліа шуис пöчыс.

– Аттьö, муса бабук! – нимкодясис зонка.

◆ Гиж тӧдчӧдӧм кывъяссӧ, инды налысь кыввужсӧ да гӧгӧрвоӧд гижанногсӧ.



173 удж. Гиж сетӧм кывъяссӧ кык торъя чукӧрӧ юклӧмӧн. Инды кыввужсӧ.

Кайис, воис, лоис, уйис, сиис, нуис, перйис, сӧйис.

◆ Мый серти торйӧдін кывъяссӧ?

◆ Лӧсьӧд кадакывъяс пыртӧмӧн кык сӧрникузя.



**Визь пыр гижсьысь тэчаса кадакывъяс.**



Кыдзи артмӧны тэчаса кадакывъяс?

Кыдзи гижсьӧны тэчаса кадакывъяс?

174 удж. Лыддды.

Со и карса этнография музей. Ваня сулаліс юрсӧ чатӧртӧмӧн да дзоргис-видзӧдіс джаджъяс вылӧ. Тані зым-видзисны-сулалісны шонді кодъ самӧваръяс. Найӧ дзирдалісны-ӧрисны мичлуннас музейӧ локтысьясӧс.

Зонкалы синмас шыбитчис медся паськыд самӧварыс. Сійӧ сулаліс быттӧ кыз рушкау баруня. Уна рӧмӧн пӧртмасис-югъяліс самӧвар вевтыс да койис<sup>2</sup> югӧрсӧ пӧтӧлӧкӧдзыс. Оз ӧд прӧста шуны: «Самӧвар – мича ичмонь».



◆ Текстусь инды кык кадакывйысь артмём кадакывъяс. Висьтав, кызди гижсьоны найö.

◆ Мый понда пыртöма текстас визь пыр гижсьысь кадакывъяссö?

◆ Кывийон серпасав самöварсö.

Кадакывъяс гижсьоны визь пыр, артмöмаöсь кö:

• матын вежöртаса кык кадакывйысь: *пуны-пöжавны, сёйны-юны, гöрны-кöдзны;*

• шы сетан либö серпасалан кадакывйысь да прöстöй кадакывйысь: *шливгыны-зэрны, дзольгыны-визувтны, варгыльтны-мунны.*

Найö мичмöдöны да стöчмöдöны миянлысь сёрнинымöс.



**175 удж.** Лыдды баблысь да внуклысь сёрнисö.

– Бабук, а кызди нö татшöм самöварнас чайсö пузьöдöны?

– Миян татшöм жö самöвар вöвлі, – казтыштіс важ олөмсö пöч. – Кисьта<sup>3</sup> вöлі васö самöварас да вевття-тупка. Сэсся песта-биала самöварсö. Трубаас сюя öзтöм сартас либö сямöд, сэсся шом. Öзийö-öгралö шомыс да öдийö пузьöдö васö.



**Сартас** – кос ломтас.

◆ Висьтав, кызди важöн самöварөн пузьöдлöмаöсь чай вылö васö?

◆ Гиж визь пыр гижсьысь кадакывъяссö.



176 удж. Содты лөсялана эмакывъяс да гиж.

1. Вөв моз рөдтө-гөнитө ... . 2. Ур моз шаркнитис-кайис пу вылө ... . 3. Бобув моз жбыргө-лэбө ... . 4. Пөлян моз ливкйөдлө-чипсө ... . 5. Йөра моз шарйө-котралө ... .



## Визь пыр гижсьысь паныд вежөртаса тэчаса кадакывъяс.



Кызди гижсьöны паныд вежөртаса тэчаса кадакывъяс?

177 удж. Лыдды.

### Гажа праздник – Вежадыр.

Вежадыр праздник лунö йöзыс пасьтасьöны мөд ногөн да гажөдчöны. Челядь и гырысь дасьтöны сямöдысь<sup>①</sup> да кабалаысь маскаяс, вежöны паськөмнысö да чукөрөн мунöны-локтöны. Найö окотапырысь ветлöны керкаысь керкаö, **пырöны-петöны**, сьылöны-йөктöны, ошкöны олысьяссö да сиöны быд бурсö көзяиныслы.

◆ Висьтав, кызди важөн пасйывлөмаöсь Вежадыр праздниксö?

- ◆ Гөгөрвоөд, кызди гижсьöны торйөдөм кывъясыс .
- ◆ Инды бөръя сёрникузясыс грамматика подувсö.



Паныд вежөртаса кадакывъясысь артмөм тэчаса кадакывъяс гижсьöны визь пыр: *локтö-мунö, пырö-петö, бөрдö-сералö.*

**178 удж.** Лыдды. Бөрйы да гиж тэчаса кадакывъ-  
яссö. Подулав налысь гижанногö правилöясөн.

Ставөн лöсьöдчисны Вежадыр праздник кежлö. Рыт-  
нас пöль вайис мичаа серöдöм важ куд. Сэни пöчыс видзö  
тшапитчан паськöм.

Ваня вöччис-пасьтасис ныв паськöмөн. Сийö баситис-  
краситис чужöмсö, маскаасис да чышьянасис<sup>2</sup>. Зонка  
рöмпöштан водзын дзирнясьыштис-вежнясьыштис мича  
платтьöнас. Сэсса мöдöдчис Катьö тьötка ордас.

**179 удж.** Лыдды нöдкывъяссö да тöдмав. Аддзы ка-  
дакывъяссö, висьтав налысь лыд, морт да кад.

1. Съöд мöс пышйö, гöрд мöс вöтчö. 2. Менö частö ко-  
рöны, а кор петкöдча, ставыс дзебсьöны. 3. Съöд öш лю-  
кыштас – ставыс водöны-дзебсьöны, гöрд öш люкыш-  
тас – ставыс чеччöны-ловзьöны. 4. Вой кежлас кык öшинь  
асьныс тупкысьöны, а шондi петигөн асьныс воссöны.  
5. Киөн и кокөн нöйтöны, а сийö век сералö-йöктö.

◆ Кутшöм вежöртасаöсь тэчаса кадакывъясыс?



**180 удж.** Бөрйы паныд вежöртаса кадакывъяс, арт-  
мöд визь пыр гижсьыс кадакывъяс да гиж. Лöсьöд  
1–2 сёрникузя.

Сетö, чеччö, кывтö, лэччö, босьтö, водö, кайö, катö.



*Сувтö – пуксьö.*



## Кадакывыйн -ДЧ-, -ТЧ-, -ЧЧ- гижём.



Кыдзи колё тōдмавны кадакывъясын -дч-, -тч-, -чч- гижём?

181 удж. Лыдды кывъяссō.

Гажōдчō, мōдōдчō, вотчō, босътчō.

- ◆ Кывъяссō шуигōн мый кылō -дч-, -тч- пыддиыс?
- ◆ Петкōдлōм серти вежлав кывъяссō. Мōвпышт, кыдзи тōдмавны, мый гижны: д али ч, т али ч?



*Гажōдчō – гажōдi, гажōдō, гажōдас.*

182 удж. Лыдды таблицасō.

-дч-	-тч-	-чч-
гласнōй водзын кылō [д]	гласнōй водзын кылō [т]	оз позъ прōверитны
гажōдчō – гажōдō	вотчō – вотō	шōйччō, лэччō

◆ Кывкōртōдав, кыдзи колё тōдмавны кадакывъясын -дч-, -тч-, -чч- гижём.

183 удж. Сетōм кывъясысь инды дч, тч, чч орфограм-маяс да вайōдōтвужъя кывъяс.

Петкōдчыны, усъкōдчыны, эштōдчыны, зымōдчыны, йиркōдчыны, копыртчыны, дзескōдчыны, мыччыны, чу-кōртчыны, ворсōдчыны.



**-Дч-** да **-тч-** шыпасъяс кывъясн кылö [чч].

Медым гижны кадакывъясн **-дч-**, **-тч-**, **-чч-**, колö кывсö вежны сідз, медым д да т бöрас кыліс гласнöй шы: *велöдча – велöда, велöдö.*

Кывсö кö оз позь прöверитны, колö гижны **-чч-**: *КОЛЬЧЧИНЫ, ТУВЧЧИНЫ.*

**184 удж.** Гиж д, т шыпасъяс содталöмön да подулав. Гиж прöверитан кывсö, инды кадакывйыслысь лыд, морт, кад.

Вашкö...чис, öв...чан, дöзмö...ча, котыр...чöны, пöрö...часны, стрöи...чаннуд.

- ◆ Инды кадакывъяссысь морт петкöдлан суффиксъяс.
- ◆ Инды орфограммасö.



*Сайöдчö – сайöдö, ö. л., 3 м., ö. к.*

**185 удж.** Лыдды кадакывъяссö колана шыпасъяс содталöмön.

### Сизь поз.

Толякöд кыкөн мöдö...чим вöрö колльөн шыбласьны. Чатөр...чим вывлань. Öти пожöмысь казялім горс. Сэні кыліс чипсöм.

Кыськö петкö...чис гöрд юра сизь. Сійö кутіс лэбавны пуысь пуö да нора горзыны. Миянлы окота лои шышкавны лэбачлысь позсö. Ме кавшаси пу вылö, но сöмын дөрöмös косялі. Сэсся энов...чи пуö кайöмысь да котöрті гортö черла.

Вайи чертö да заводити пöрö...чыны<sup>3</sup>. Керасигөн мян дорö матыс...чис Конö Семö. Сийö сёрниын тö...чис скөр-мём. Омöльтор вöчöмысь ви...чис мян вылö. Ми уськö...чим гортлань.

*Г.Юшков серти*


◆ Лыдды висьтысь став кадакывсö. Мыйла гижысь-ыс пыртöма текстас уна кадакыв?

◆ Гиж дч, тч да чч шыпасъяс кадакывъяс да гөгөр-воöd налысь гижанногсö.

◆ Кызди гөгөрвоан **горс** кыв?

**186 удж.** Лыдды гижöдсö.

Гöрд юра сизь шурснитис пуяс костöд, лэчыд гыжъяснас **шашаритчис** пуö да мыджсис дженъыд бöж вылас. Сийö топöдис пу потасö вайöм коль да **босьтчис** сизьдыны сэтчö. Пöткаыд дугдывтöг **тотшкöдчис**, сьö-лёмсянныс **дорччис**.



*В.Торопов серти*

◆ Гөгөрвоöd тöдчöдöм кадакывъяслысь гижанногсö.



**187 удж.** Юклы сёрникузяяс вылö да гиж. Чутъяс местаö содтав колана шыпасъяс. Визьнит кадакывъяссö.

Сизь – тöвйысь вöрса л...бач с...йö олö пожöма вöр-ын ёсь нырнас кодйö горс да позъялö с...тчö сизь пуысь корсьö пучöйясöс да номыр...ясöс тулыснас роз...öдö кызд пулысь с...мöдсö да чöсмас...ö зараваён

## КЫВБЕРД



### Кывберд да сылөн вежортас.

?

Мый петкөдлө кывберд?  
Мыйла колөны кывбердъяс?  
Кыдзи төдмавны кывбердсө?

**188 удж.** Лыдды. Гөлөсөн төдчөд логическөй ударениеа кывъяс.

Менсым лолөс кыпөдө  
Тулыслөн сөдз мич.  
Веж турунөн кыпөдчө  
Эжвасайса видз.

*З.Шиликова*

◆ Төдчөдөм кывъяс дорө сувтөд юалөмъяс да гөгөр-воод налысь вежортассө.

◆ Кутшөм кывсикаскөд йитчө кывбердыс?

**189 удж.** Лыдды гижөдсө да аддзы кывбердъяс.

### Пармаө воис тулыс.

Ярьюгыд шондi сывкнитiс югөрсө вөр-ва пасьта да нюлыштiс лымсө. Шоньд бордъяс вылын воис пармаө гажа тулыс. Танi ставыс ловзё.

Гөгөр дзольгөны варов шоръяс<sup>④</sup>. Быдөнөс шымыртө аслас чөскыд көрнас небыдик төвру. Вөр пасьтала кылө гажа лэбачьяслөн эзысь жыннян кодь зильгөмыс. Кыдз

пуяс вылө тулыс өшлөма кузь исергаяс. Кокниа лолавсьö сөстөм сынөднас.

Пыр эськө нимкодясян тайö мичлуннас!



*Ярьюгыд шондi, ...*

- ◆ Кызди колö тöдмавны кывберд?
- ◆ Лыдды текстсö кывбердъястөг. Кызди вежсис гижöдыс?
- ◆ Адды да гиж текстсыс *кывберд* + *эмакыв* схема серти кывтэчасьяс.

**190 удж.** Содты лөсялана кывбердьяс да гиж.

... шондi кыпöдчöма енэж шöрас. ... лунö быдөнöс кыскö **кыддза** раскö. Кутшöм мичаöсь ... кока **кыдзь-ясыс!** ... туй лэччöдö ... шор дорö. Сэни варова дзольгö ... ва. Сэтшöм окота юыштны сэтысь ... васö!

Отсөг кывьяс: *векни, гажа, сөстөм, еджыд, вöрса, чöскыд, тувсов.*

- ◆ Содты 1–2 сёрникузя да юрнимав серпаса гижöдсö.



**191 удж.** Содты 2–3 кывберд вежöртас серти.

Мортлөн сям, качество: шань, ...

Рöм: виж, ...

Кад: тувсовья, ...

Ин: вöрса, ...

Ыджа: гырысь, ...



## МЕД- кывводза кывбердъяс.



Мый петкөдлө мед- кывводз кывбердъясын?

**192 удж.** Лыдды кыв параяссө да орччөд найос ве-  
жөртас да гижанног сертиыс.

медшань – медся шань

медбур – медся бур

**Мед-** кывводз кывбердъяскөд гижоны өтлайн:  
*медбур, медыджыд.*

**Мед-** кывводз пасйоны пасөн: медбур.

**Медся** кыв кывбердъяскөд гижоны торйөн:  
*медся бур, медся ыджыд.*

**Мед-** кывводз да **медся** кыв петкөдлөны пред-  
метлысь медвылыс тшупода признак.



**193 удж.** Лыдды кывбурсө.

### Тури.

Висьтав меным тэ, бур ань,

Кытөн олөм медся шань?

Лэбигмозыс тури шуө:

Медбур<sup>②</sup> олөм – аслам муын!

*В.Лыткин*

◆ Мый петкөдлөны **медся шань** да **медбур** кывъясын  
мед- кывводз да **медся** кыв?

◆ Висьтав, кызди гижоны кывбердъяскөд **мед-** кыв-  
водз да **медся** кыв.

**194 удж.** Содты кывбердъяс дорö мед- кывводз да гиж.

Мича, кузь, шоныд, важ, гажа, төлка, шуда, сюсь, шоныд.



*Ичöt – медічöt, ...*

◆ Лöсьöд 1–2 сёрникузя.

**195 удж.** Орччöд кывъяссö, содты мед- кывводза кывбердъяс.

Югыд – медъягыд, ён – ..., яр – ..., еджыд – ... .

- ◆ Висьтав, кор колö гижны торйöдан ть.
- ◆ Пасйы кывбердъясын орфограммасö.



**Мед-** кывводза кывбердъясын **е, ё, ю, я** водзын гижöны торйöдан **ть**: *медъеджыд, медъён, медъюмов, медъяр.*



**196 удж.** Бөрйы паныд вежöртаса кывбердъяссö да гиж артмöм параяссö.

Медмисьтöм, медся зіль, медся кузь, медвöсни, медся голь, медся том, медсьöкыд, медся небыд.



*Медмисьтöм – медмича, ...*

◆ Лöсьöд кык сёрникузя да гиж.

Отсөг кывъяс: *медкыз, медкокни, медся пöрысь, медмича, медся чорыд, медся дыш, медся озыр, медся дженъыд.*



## **-ИНИК (-ІНИК) суффикса кывбердъяс да найöс гижöм.**

Кутшöм вежöртас кутö кывбердъясын **-иник (-іник)** суффикс?

?

Кор вöдитчöны **-иник (-іник)** суффиксъясöн?

Кызди гижсьöны **-иник** суффикса кывбердъяс?

**197 удж.** Лыдды кывъяссö да орчöд.

руд – рудіник

лэчыд – лэчыдіник

зіль-зілиник

том – томиник

- ◆ Мыйöн торъялöны **руд – рудіник** кывъяс?
- ◆ Мый öткодъыс сетöм кыв параяслöн?
- ◆ Кывбердъяслысь кутшöм юкөн тöдчöдöма?
- ◆ Висьтав, кор колö гижны **-иник**, а кор **-іник**?
- ◆ Вöч кывкöртöд: мый петкöдлö кывбердъяслөн **-иник (-іник)** суффикс да кутшöм гласнöй гижсьö?



Параа чорыд **д, з, л, н, с, т** бöрын **-іник** суффикса кывбердъясын гижöны **і: косіник.**

Став мукöд шыпас бöрын гижöны **и: важиник, дышиник.** Тайö суффикса кывбердъясыс петкöдлöны лелькуйтана да ичöтмöдана вежöртас.

**198 удж.** Содты эмакывъяс дорас **-иник- (-іник)** суффикса кывбердъяс да гиж.

... лун, ... бадь, ... быдмӧг, ... енэж, ... ур.


Отсӧг кывъяс: *пельк, нэр, ыркыд, шоч, лӧз.*



**Косіник морт.**

◆ Кор тэ вӧдитчан **-иник- (-іник)** суффикса кывбердъясӧн?

◆ Лӧсьӧд кывбердъясӧн 2 сёрникузя.



**199 удж.** Лыдды.

**Тувсов серпасъяс.**

Тулыс! Мыйта радлуныс да мичлуныс тайӧ дженъыдик кывъяс! Пыдӧстӧм лӧзіник<sup>②</sup> енэжыс сӧстӧм, быттӧ ваӧн мыськӧма. Шонді сывкнитас ассьыс лышкыдіник

югөръяссö вөр-ва пасьта да заводитас тэрмасьтöг шлыв-гыны аслас веськыд туйöд. Быдлаö инмалö сылөн пöсь кывйыс: то нюлыштас вöснъыдик коркаөн вевттьысьöм лымсö, то небыдика малыштас пуяслысь жебиник<sup>2</sup> на вожъяссö, сарөгöсь кокъяссö. Шоныдджык лунъяснас туйяс вывті писькөдчöны варовиник шоръяс, тэрмасьöны юлань.

*И.Коданёв серти*

◆ Тöдмав текст сикассö: юөртöм, серпас, мөвпалöм. Мый серти тайö тöдмавсьö?

◆ Кутшöм кывбердъяс пыртöма гижöдас?

◆ Гиж **-иник (-иник)** суффикса кывбердъяс, гөгөрво-öд налысь гижанногсö.

◆ Кутшöм мөгөн И.Коданёв пыртöма аслас гижöдö **-иник (-иник)** суффикса кывбердъяссö?



**200 удж.** Лыдды. Торйöдöм кывбердъясысь артмөд **-иник (-иник)** суффиксьясөн кывбердъяс да гиж текстсö.

### Парма.

Помтöм мичлун ас пытшкас видзö коми парма. Миян пармаын быдмöны **веськыд** пожöмъяс, **пöрысь** козьяс. Коз пусö гожöмнас шонтö **югыд** шондi, тöвнас вевттьö **небыд** лым. Пармаыд козьналас тэныд чöскыд сэтöр, юмов öмидз.



**201 удж.** Наблюдайт тувсовъя серпаслысь мичлунсö. Гиж «Коми муö воис тулыс» нима текст-серпас. Дась-ты проект да дорйы сйöс.



## **-КОДЬ суффикса кывбердъяс да найös гижöм.**



Кутшöм вежöртасыс **-кодь** суффикса кывбердлөн?

**202 удж.** Орччöд кывъяссö.

шань – шанькодь

мича – мичакодь

- ◆ Мыйön öткодьöсь кывъясыс?
- ◆ Мыйön найö торъялöны?
- ◆ Кыдзи гижсьö кывбердкöд **-кодь** суффикс?
- ◆ Кутшöмöсь вежöртас сертиыс **-кодь** суффикса кывбердъяс?



**-кодь** лоö кывберд суффиксөн да петкöдлö предметлысь абу тыр признак.

**-кодь** суффикс кывбердкöд гижсьö öтлаын: **чöскыдкодь, ёнкодь.**

**203 удж.** Лыдды висьтсö да гиж скобкаяс восьталöмөн.

### **Кыдзи тöвйö ур.**

Урыд<sup>3</sup> тöвнад кöдзыдысь оз пов<sup>3</sup>.  
Пырас сйö позйö да розсьö тупкас.  
Сэсся водас небыд (кодь) вольпась вылас, шебрасяс пушыд (кодь) гöна бöжнас да узьö. Урыдлы лöсьыд, шоньд сэни!  
Ывлаас пöльтö чизыр (кодь) кöдзыд тöv, омлялö, нöбöдö чорзьöм лымсö<sup>4</sup>.



◆ Визьнит кадакывъяссö, пасйы кад формасö.



204 удж. Вайöd кывбердъяс дорö паныд вежöртаса



кывъяс.

Ёнкодъ<sup>②</sup> – ..., вöсникодъ – ..., важкодъ – ..., пемыд-кодъ – ..., пöрыськодъ<sup>②</sup> – ..., ыджыдкодъ – ... .



205 удж. Юклы сёрникузяяс вылö да гиж. Висьтсö юрнимав.

Тэрыб ур öти местаын пукавны оз вермы сийö ёна заптысьö тöv кежлö пемöс котралö пуяс костöд урыд öктö тшаксö да öшлö косьтыны пу увъяс вылö тövнад урыд оз нин мöd тшыгъявны сийö бура тövъяс аслас шоныд горсъяс.



## Кывбердкöd да эмакывкöd КОДЪ КЫВ ГИЖАННОГ.



Мыйöн лоö кодъ кывбердын?

Кызди гижöны кодъ кыв эмакывкöd?

206 удж. Орчöd кывсö да кывтэчассö.

шыльыдкодъ

рöмпöштан кодъ

◆ Кутшöм кывсикаскöd кодъ кыв лоö кывбöрөн да гижсьö торйөн?

◆ Кутшöм кывсикасын -кодъ лоö суффиксөн да гижсьö öтлаын?



Кывбердын **-кодъ** лоӧ суффиксӧн да гижсьӧ ӧт-  
лаын: *ЫДЖЫДКОДЪ*.

Эмакывкӧд **кодъ** лоӧ кывбӧрӧн да гижсьӧ  
торйӧн: *синва кодъ сӧдз ва*.

**207 удж.** Лыдды гижӧдсӧ. Гиж **-кодъ** суффикса кыв-  
бердъяс да **кодъ** кывбӧра эмакывъяс.

### Мича юсь.

Сиктсянь неылын эм ты. Тыслӧн веркӧсыс рӧмпӧш-  
тан кодъ шылъыд<sup>③</sup>.

Мунам<sup>③</sup> ми батькӧд ты бок-  
тыс. Берегсянь неылын шлыв-  
гис-кывтӧс лым кодъ еджыд  
юсь<sup>①</sup>. Сийӧ сувтыштӧс, нюкыль-  
тӧс кузькодъ<sup>②</sup> голясӧ да сунгы-  
лӧс са кодъ сьӧд нырсӧ ваӧ<sup>④</sup>.  
Бӧр лэптӧс юрсӧ да нюжӧдӧс го-  
лясӧ вывлань. Сэсся кыз тай  
швачнитас вына борднас! Ылӧдз  
резӧбтӧсны ва войтъяссыс. Недыр  
олыштӧм бӧрын заводитӧс ныр-  
нас лӧсьӧдавын дзугсьӧм гӧнсӧ.

Мойд кодъ шемӧсмӧдана да  
мича тайӧ серпасыс!



- ◆ Кызди художествоа гижӧдын серпасалӧма юсьсӧ?
- ◆ Мыйла вӧдитчӧны художествоа гижӧдын эмакыв-  
кӧд **кодъ** кывбӧра орччӧдӧмъясӧн?



Художествоа гижёдын тшөкыда отиторсö донъялöны мөдторкөд откодялөмөн. Тайö лоö орччөдөмөн: *мойд кодь шемөсмөдана*. Орччөдөмъяс мичмөдöны миянлысь сёрнинымös.

**208 удж.** Лыдды кывъяссö да дасьтысь гижны найös кывзөмөн. Инды орфограммаяссö.

Медшуда, лөсьыдiник, серакодь, медтöлка, медъюгид, томиник, важкодь.

◆ Кызди төдмавны **лөсьыдiник** кывлысь кыввужсö?



**209 удж.** Аддзы эмакывъяс дорö -кодь суффикса кывбердъяс.

... гөлös, ... сьыланкыв, ... шор, ... лун, ... көр.

◆ Лөсьод кык сёрникузя да гиж.



**Рём петкөдлысь тэчаса кывбердъяс да найös гижөм.**



? Кызди гижöны рём петкөдлысь тэчаса кывбердъяс?

**210 удж.** Лыдды кывбердъяссö да висътав, кызди найö артмөмаöсь.

<b>гөр</b>	югидгөр	пемыдгөр	лөзовгөр
<b>руд</b>	югидруд	пемыдруд	лөзовруд
<b>виж</b>	югидвиж	пемыдвиж	лөзоввиж

- ◆ Кызди гижсьоны рөм петкөдлысь тэчаса кывбердъяс?
- ◆ Мый петкөдлө тэчаса кывбердъяслөн воддза юкөн-ыс?



Рөм петкөдлысь тэчаса кывбердъяс гижсьоны өтлаын: *алөйгөрд, сьөдруд.*

**211 удж.** Гиж кывбердъяс дорө лөсялана эмакывъяс.

Пемыдлөз ..., турунвиж ..., кольквиж ..., кельыдлөз ..., югыдгөрд ... .

Отсөг кывъяс: *ю, пөлөзнича, бобөнянь, купальнича, лапкор.*



**212 удж.** Гиж лөсялана кывъяс содтөмөн.

Миян войвылын медводз мыччысьö-петö ... вижъюр дзоридз. Сійöс ылысянь аддзан. Гожөмнас ... рөма дзоридз-ыс вошö. Сыысь артмö небыдик гөн шар. Пöльыштас тöвру, и гөгрöс тупылыыс лэбас. Заас кольö ... гөгрöс кизь.

*С.Раевский серти*

Отсөг кывъяс: *пемыдвиж, югыдвиж, кольквиж.*



## Визь пыр гижан тэчаса кывбердъяс.

Кыдзи гижсьö кык öткодь кывйысь артмöm кывберд?



Мый петкöдлöны кык öткодь кывйысь артмöm тэчаса кывбердъясыс?

**213 удж.** Лыдды.

лöз – лöзысь-лöз  
мича – мича-мича

◆ Мыйöн торъялöны кывъясыс вежöртас сертиыс?

◆ Кыдзи гижсьö кык öткодь кывйысь артмöm кывберд?



Кык öткодь кывйысь артмöm кывберд петкöдлö вылын тшупöда признак да гижсьö визь пыр:  
*КУЗЬЫСЬ-КУЗЬ, ПОСНИ-ПОСНИ.*

**214 удж.** Артмöd тэчаса кывбердъяс сетöm кывъясыс да гиж.

Ыджыд, бур, дзескыд, ён.

◆ Лöсьöd кывъяссö пыртömön да гиж 2 сёрникузя.

**215 удж.** Вайöd татшöm жö орфограммаа кыв.

Гырыськодъ – ..., пемыд-пемыд – ..., тёпкö-виялö – ...,  
Эжва – ... .

216 удж. Лыдды текстсö.

### Мича прöшви.

Вотчöм бöрын Ваня нюжöдчис небыдик<sup>③</sup> нитш вылö. Юр весътас лöзысь-лöз енэж. Зонка синсö куньöмөн куйлыштис. Сэссия восьтис синсö да видзöдлис орччөн су-лалысь ляпкыдкодъ коз пуяс вылö. А сэнi прöшви кодъ мичаысь-мича серпас! Тайö зиль чераньлөн уджыс. Сийö кыöма татшöм мичаторсö<sup>②</sup>. Везйыс<sup>②</sup> уна рöмөн югъялис-вералис яръюгыд шондi водзас.

- ◆ Мыйла текстыслы сетöма татшöм ним?
- ◆ Кутшöм кывбердъясөн серпасалöма вөр-васö?
- ◆ Торйöдöм кывъясылысь гөгөрвоод гижанногсö.
- ◆ Гиж текстсыыс кывбердъяссö анбур серти.
- ◆ Тöдмав нöдкыв: *Ичöтик-ичöтик ныв, а став мирсö пасьтöдö.*
- ◆ Ачылд лөсьöд нöдкыв: *Мичаысь-мича ... .*

217 удж. Лыдды. Юрнимав текстсö да гиж скобкаяс восьталöмөн.

Кыдзрассянь неылын грездсалөн эм гулыд яг. Танi шувгöны (кузыйсь кузь) пожöмъяс, мойдöны помасьлы-тöм мойд. Яг боктi (тельгö визувтö) (сöдзысь сöдз) шор. Ваыс тайö шорас (синва кодъ) сöстöм. Уна вотчысьöс да кыйсьысьöс юктöдлис тайö шорыс (чöскыд кодъ) кöра ва-өн. (Гажаысь гажа) ягыс уналысь кыпöдлис ловсö.

- ◆ Инды текстысь кывбердъяс.
- ◆ Гөгөрвоод тэчаса кывбердъяслысь гижанногсö.



218 удж. Содты лөсялана кывъяс да гиж.

Öти войö йөрö воис ... Войпель. Сійö вайöдиc кытысь-кö ... кымөръяс. Найö шебралісны ... бобöняньöс ... эшкынөн. Узьö бобöнянь ... эшкын улын да вöтасьö ... гожöм, ... төвру да ... шондi йылысь.

*И.Белых серти*

Отсöг кывъяс: *сьöдруд, жар, югыдгöрд, мелі, ярь-югыд, кöдзыд, шоныд, еджыд.*

- ◆ Текстысь визьнит тэчаса эмакывъяс?
- ◆ Кызди тiян сиктын шуöны **бобöнянь**?



**Визь пыр гижан тэчаса кывбердъяс.**



Кызди гижöны паныд да матын вежöртаса кывъясысь артмöм тэчаса кывбердъяс?

219 удж. Лыдды кывбердъяссö.

сьöда-еджыда | кузя-дженъыда

- ◆ Кызди артмöмаöсь кывбердъясыс?
- ◆ Кызди гижсьöны **-а** суффиксөн артмöм паныд вежöртаса тэчаса кывбердъяс?



Паныд вежöртаса кывъясысь **-а** суффиксөн артмöм тэчаса кывбердъяс гижсьöны визь пыр: *сьöда-еджыда.*

**220 удж.** Лыдды кывъяссö, гөгөрвоод гижанногсö.

киа-кока | дөрöма-гача



**-а** суффиксöн артмöm öтвывтан вежöртаса тэ-  
часа кывбердъяс гижсöны визь пыр: *уска-тошка,*  
*козья-пожöма.*

**221 удж.** Гиж колана ногөн скобкаын сетöm тэчаса кывбердъяссö.

1. Лöза (вижа) югöръяс котралісны енэж войладор бо-  
кын. 2. Жар да лöддза (номъя) гожöмö сьöкыд овны скöt-  
лы. 3. Уска (тошка) Кöдзыд Пöль кучкие паличнас, и коз  
ыпнитіс уна рöма мичаысь (мича) биөн.

**222 удж.** Корсь кывбердъяссö, гиж да гөгөрвоод на-  
лысь гижанногсö.

Радлö-горзö, югыдысь-югыд, чера-пищала, чери-яй,  
кывтö-катö, пуркйö-петö, ыджыд-ыджыд, шливгö-зэрö,  
сьöда-гөрда, ризъялö-котралö.

◆ Инды öткодълунсö кывъяслысь.

◆ Кыдзи гижсöны **-а** суффиксöн артмöm öтвывтан  
вежöртаса тэчаса кывбердъяс?

**223 удж.** Лыдды кывъяссö да дасьтысь гижны кыв-  
зöмөн.

Пувъя-чödъя, лэбач-пötка, парма-вöрын, гусятор, чера-  
пищала, сёян-юан.

**224 удж.** Содтав сёрникузяясас 223-өд уджысь лөсялана эмакывъяс да кывбердъяс. Гиж.

Коми мортыдлөн<sup>②</sup> сьөлөмыс бурмө сөмын ... . Тани сылөн ... . Веськалан кө ... местаө, вотчы зіля. ... мортыд вөрөд ветліг-мунигас казаявлө сэтысь уна ... . Быд ... оло аслас олөмөн<sup>③</sup>.

**225 удж.** Гиж скобкаяссө восьталөмөн. Инды кывбердъяссө.

Ми кыпөдчим вертолётөн печорайывса парма весьтө. Саридз моз шыльквидзис (помтөм дортөм) вөр. (Посни посни) шоръясыс көр сюръяс кодьось. Найө юклөдлөны веж пармасө. Көнсюрө тыдалөны ичөтик өтка керкаяс.

*В.Ширяев серти*

◆ Содты 1–2 сёрникузя.

**226 удж.** Лыдды кывбурсө колана ногөн. Лөсьөд 2–3 сёрникузя чужан кывлөн коланлун йылысь.

### **Чужан кыв.**

Зарни бордъяса,  
Медся мыла,  
Чужан кыв –  
Менам олөм да вөт.  
Позьё сёрнитны  
Любөй кылөн,  
Сөмын өддортны ассыым  
Ог мөд.

Сійө тіявлөн,  
Пөльяс, пөчьяс.  
Сійө тіявлөн,  
Ныв да зон.  
Мөвпыд ас кывйөн  
Кык пөв стөчмө,  
Мортыд ас кывйөн –  
Кык пөв ён.

*В.Тимин*

## 1 индөд. Сёрникузя видлалан тэчас.

1. Сёрникузя. Сійөс шуөм либө гижөм.
2. Висьталан мог серти:
  - юөртана;
  - юалана;
  - чуксалана.
3. Шуанног серти:
  - горөдана;
  - абу горөдана.
4. Сёрникузя сюрөса юкөдъяс:
  - подувпас;
  - юөрпас.
5. Содтана юкөдъяс. Төдмав найөс юалөмъяс серти.
6. Өтсыма юкөдъяс (эм кө).

**Матысса вөрын шөйтисны ош да ошпи.** (С.Пылаева)

Сёрникузяыс юөртана, абу горөдана. Висьтавсьө **ош** да **ошпи** йылысь. **Ош** да **ошпи** лооны подувпасөн, вочавидзöны **кодъяс?** юалөм вылө, гижигөн петкөдлам öти визьөн. Мый висьтавсьө подувпас йылысь? Ош да ошпи мый вөчисны? – **шөйтисны**, вочавидзö **мый вөчисны?** юалөм вылө. **Шөйтисны** – юөрпас, визьнитам кык визьөн. **Ош** да **ошпи шөйтисны** – сёрникузялөн грамматика подув. Сетам юалөм юөрпассянь **вөрын** эмакыв дорö: **шөйтисны көни?** **Вөрын** – содтана юкөд. **Вөрын** содтана юкөдсянь сетам юалөм **матысса** кыв дорö: **кутшөм вөрын?** **Матысса** – содтана юкөд.

Сёрникузяын кывъяс костысь йитөдъяссö петкөдлам визьөн.



**Гижöда сёрни.**

**Буретш – [бу–рэч] 2 слог.**

[б] – согл., чорыд, паратöм; гора, параа – [п]

[у] – гл.

[р] – согл., чорыд, паратöм; гора, паратöм

[э] – гл.

[ч] – согл., чорыд, параа – [ч’]; гора, параа – [z]

5 шы, 6 шыпас.

### **3 индöд. Кыв тэчас серти кыв видлалöм.**

1. Гиж (лыдды) кывсö да гөгөрвоод сылысь вежөр-тассö.

2. Аддзы кывйысь кывдін да кыв вежлалан суффиксö. Сы могысь тöдмав кывсикассö, вежлав кывсö. **Зорö-дасьöны** кывйын кывдіныс **зорöдась**, -ö- да -ны – вежлациян юкөнъяс. Петкөдлы  $\hat{\square}$  пасөн.

3. Аддзы кыввуж. Та могысь бөрйы öтвужъя кывъяс (**зорöd, зорöда, зорödтöм, зорöдавны**), орччöd найöс да инды öткодъ юкөнсö. Öткодъ юкөнныс **зорöd**, сійö и лоö кыввужйөн. Петкөдлы  $\frown$  пасөн.

4. Аддзы кыв артмöдан суффикс. Сійö сулалö кыввуж бöрын да артмödö выль кыв. **Зорöd** кывйысь артмöма **зорöдасьöны** кадакыв, -ась- – кыв артмöдан суффикс. Петкөдлы сійöс  $\wedge$  пасөн.

**зорöd ась ö ны**

## 4 индөд. Эмакыв видлалан тэчас.

1. Кывсикас.
  2. Подув форма (нимтан вежлөг, өтка лыд).
  3. Ловъя либө ловтөм.
  4. Вежлөг.
  5. Лыд.
- Содтөд: асалан суффикс (1, 2, 3 морт).

**Гижтөм сёрни.** Көзаяка сетіс каньыслы йөвтор.

**Каньыслы** – тайө эмакыв. Сылөн подув формаыс – **кань**. **Каньыслы** кыв – ловъя. Сёрникузьяын сулалө сетан вежлөгын, өтка лыдын. Содтөд: эм 3 морта асалан **-ыс-** суффикс.

**Гижөда сёрни.**

**Каньыслы** – э., кань, ловъя, с.в., ө.л., 3 морт, **-ыс-**.

## 5 индөд. Кадакыв видлалан тэчас.

1. Кывсикас.
2. Кывпод.
3. Лыд.
4. Морт.
5. Кад.

**Гижтөм сёрни.** Куим ая-пия петісны уджавны.

**Петісны** – тайө кадакыв. Сылөн кывподөн лоө **петны** кадакыв. Сёрникузьяын сулалө уна лыдын, 3 мортын, колян кадын.

**Гижöда сёрни.**

**Петісны** – к-к., петны, у.л., 3 морт, колян к.

## **6 индöд. Кывберд видлалан тэчас.**

1. Кывсикас.

2. Кутшöм эмакывкöд йитчöма.

Оліс-выліс налим сера кань,

Еджыд **уска**, пушыд бöжа ань. (*В.Лыткин*)

**Уска** – тайö кывберд, йитчöма **ань** эмакывкöд.

## **7 индöд. Морта нимвежтас видлалан тэчас.**

1. Кывсикас.

2. Лыд.

3. Вежлög.

4. Морт (1, 2, 3 морт).

И Рыжко вöв эм – сюсь да ён,

Ме вердла **сійöс** няньön. (*В.Лодыгин*)

**Гижтöм сёрни.**

**Сійöс** – тайö морта нимвежтас. Сёрникузьян сулалö öтка лыдын, керан вежлögын, 3 мортын.

**Гижöда сёрни.**

**Сійöс** – н., ö.л., к.в., 3 морт.

## **8 индöd. Кызди уджавны изложение вылын.**

1. Кывзы либö лыдды текстсö.
2. Тöдмав вежöртассö гөгөрвотöм кывъяслысь.
3. Тöдчöд текстыслысь темасö да шөр мөвпсö.
4. Лöсьöд план. Та могысь: торйöд текстсö юкөнъяс вылö; быд юкөнлы сет ним.
5. Гөгөрвоод кывъяслысь гижанногсö, висътав пунктуация пасъяс йылысь.
6. Кывзы либö лыдды текстсö мöдысь.
7. Гиж текстсö.
8. Прöверит уджтö.

## **9 индöd. Кызди уджавны проект вылын.**

1. Бөрйы тема.
2. Мөвпышт, мыйла тайö темасö колö тöдны да туявны.
3. Проект удж водзын пукты мог.
4. Лöсьöд план: кызди тэ кутан уджавны проект вылын.
5. Бөрйöм тема серти чукöрт материал (видлав кывкудъяс да небөгъяс, вöч гижöдъяс да пасйöдъяс).
6. Вöч проект удж (ас вöчöм да серпасалöм небөг, таблица, кывкуд да мукöд).
7. Дорйы ассыд проект уджтö класс водзын.

## 10 индöd. Вежлögгьяс, на дорö юалöмгьяс.

	Вежлögгьяс	Юалöмгьяс	
1.	Нимтан (Н.в.)	кодi?	мый?
2.	Асалан (А.в.)	кодлön?	мыйлön?
3.	Босътан (Б.в.)	кодлысь?	мыйлысь?
4.	Сетан (С.в.)	кодлы?	мыйлы?
5.	Керан (К.в.)	кодöс?	мый?
6.	Керанторъя (К-т.в.)	кодön?	мыйön?
7.	Öтвывтан (Ö.в.)	кодкöd?	мыйкöd?
8.	Торйödан (Т.в.)	кодтög?	мыйтög?
9.	Могман (Мог.в.)	кодла?	мыйла?
10.	Ина (И.в.)	кодын?	мыйын? кöни?
11.	Петан (Пет.в.)	кодысь?	мыйысь?
12.	Пыран (Пыр.в.)	кодö?	мыйö? кытчö?
13.	Матыстчан (Мат.в.)	кодлань?	мыйлань?
14.	Блыстчан (Б.в.)	кодсянь?	мыйсянь?
15.	Вуджан (Вудж.в.)	–	мыйöd? мыйти?
16.	Воан (Воан в.)	кодödз?	мыйödз?

## ВЕЖӨРТАС ГӨГӨРВОӨДАН КЫВКУД

**вад** – вөрса ты  
**вөрса прөсек** – визирка, вөрын мортөн вөчөм туй  
**дав** – вылын местаын коръя пуа вөр  
**дөрапас** – госуларстволөн, республикалөн пас, флаг  
**енбиа** – ыджыд сяма да таланта  
**жельнөг** – лежнөг  
**заветка** – додь вожсө доддяс йитан гез либө ньөр  
**зоб** – лэбачлөн сьов юкөн. Комиён чуль. Сэтчө сёяныс чу-  
көрмө да поснялө  
**канпас** – республикалөн пас, герб  
**кантеле** – шылада (музыкальнөй) инструмент  
**катшашыдөс** – шыдөс кодь песни лым  
**кашемир** – вурунысь вөсниа кыём дөра  
**китайка** – хлопокысь топыда кыём дөра  
**конда** – вуж вылас косьмөм, сэсся пөрөм сирөд пу  
**мөтыр** – бипур весьтө пусян доз өшөдан көрт либө пу  
бедь  
**нартитны** – омөльтны, өбөдитны, дойдны  
**Нөримө** – фольклор гижөдысь геройлөн ним  
**ной** – вурунысь топыда кыём матерье  
**ордым** – вөрын векныдик пода туй  
**пес керас** – пес кераланін  
**пөлать** – пөвъясысь вылө вөчөм узьланін  
**Прокопей, Илля лун** – вичко да йөзкостса празникъяс  
**репас** – лымйын вөрса лэбачлөн (сьола-тарлөн) узьланін  
**сартас** – кос ломтас  
**сюртчысь** – зорөд тэчөм бөрын турунсө зорөд улас  
сюялысь-тувкөдысь

**табун** – вöв чукöр

**тшамъя** – вöралысьяслөн джуджыд сюръяяс вылö лэптöм  
прöмыс видзан неыджыд керка

**уезд** – территория юкөнлөн важся ним. Лöсялö öнiя рай-  
онлы

**чудь** – финн-угор вужвойтырса важ йöз, асьнысö гуавлö-  
маöсь, абу кöсьылöмаöсь Кростос вераö пырны

**шляка** – ва лым



## ЮРИНДАЛЫСЬ

### СЁРНИКУЗЯ, СЁРНИ ДА ТЕКСТ

Сёрникузя сикасъяс.....	4
Текст. Паськыд да векныд тема.....	6
Текст сикасъяс.....	9
Художествоа да наука гижӧдъяс.....	11
Текст-серпас.....	14

### СЁРНИКУЗЯ

Грамматика подув. Сюрӧса да содтана юкӧдъяс.....	16
Кывтэчас да сёрникузя .....	18
Ӧтсыма юкӧдъяса сёрникузяяс.	
Ӧтсыма юкӧдъяс костын да, и кывйитӧдъяс .....	20
Ӧтсыма юкӧдъяс костын чутік .....	22
Ӧтсыма юкӧдъяс костын а, но кывйитӧдъяс .....	25
Ӧтсыма юкӧдъяса сёрникузяясын пунктуация пасъяс..	27

### ШЫ ДА ШЫПАС

Гласнӧй да согласнӧй. Чорыд да небыд согласнӧйяс.	
Гора да гортӧм согласнӧйяс.....	30
Согласнӧйяс бӧрын і да и шыпасъяс гижӧм .....	32
Ъ да ь торйӧдан пасъяс. Ъ – небыдлун петкӧдлан пас..	34

### КЫВЛӦН ТЭЧАС

Кыввуж. Ӧтвужъя кывъяс да кыв формаяс.	
Кыввужйын содтана [й], [к], [м], [т] шыяс.....	37
Кывдін да кыв вежлалан суффиксъяс.....	40
Кыв вежлалан суффиксъяс да кывдін .....	42

Кыв артмөдан суффиксьяс.....	44
Тэчас сертиыс кыв видлалөм .....	46
Кыв юкөнъяс.....	47

## **ЭМАКЫВ**

Эмакыв. Эмакывлөн вежөртас.....	50
Эмакывлөн нимтан, асалан, босьтан, сетан вежлөгъяс..	52
Керан да керанторъя вежлөгъяс .....	55
Өтвывтан, торйөдан да могман вежлөгъяс.....	57
Ина, петан да пыран вежлөгъяс.....	59
Матыстчан, ылыстчан, вуджан да воан вежлөгъяс.....	62

## **НИМВЕЖТАС**

Первой, мөд да коймөд морта өтка да уна лыда нимвежтасъяс .....	66
Өтка лыда морта нимвежтасъяслөн вежлөг серти вежласьөм .....	69
Уна лыда морта нимвежтасъяслөн вежлөг серти вежласьөм .....	71

## **КАДАКЫВ**

Кадакывлөн лыд да морт серти вежласьөм .....	75
Кадакывлөн кад серти вежласьөм .....	79
Кадакывлөн морт серти вежласьөм да морта суффиксьяс .....	81
Соссяна кадакывъяс.....	84
Соссяна кадакывъяс гижанног .....	87
Кадакыв кыввужйын й шыпас.....	90
Визь пыр гижсьысь тэчаса кадакывъяс.....	92

Визь пыр гижсьысь паньд вежӧртаса тэчаса кадакывъяс.....	94
Кадакывйын -дч-, -тч-, -чч- гижӧм .....	96

## **КЫВБЕРД**

Кывберд да сылӧн вежӧртас.....	99
<b>МЕД-</b> кывводза кывбердъяс.....	101
<b>-ИНИК (-іНИК)</b> суффикса кывбердъяс да найӧс гижӧм .....	103
<b>-КОДЬ</b> суффикса кывбердъяс да найӧс гижӧм .....	106
Кывбердкӧд да эмакывкӧд <b>кодь</b> кыв гижанног .....	107
Рӧм петкӧдлысь тэчаса кывбердъяс да найӧс гижӧм .	109
Визь пыр гижан тэчаса кывбердъяс.....	111
Визь пыр гижан тэчаса кывбердъяс.....	113

## **ВЕЛӦДЧЫСЬЛЫ ОТСӦГ ВЫЛӦ**

1 индӧд. Сӧрникузя видлалан тэчас.....	116
2 индӧд. Шы да шыпас серти кыв видлалан тэчас ....	117
3 индӧд. Кыв тэчас серти кыв видлалӧм .....	118
4 индӧд. Эмакыв видлалан тэчас.....	119
5 индӧд. Кадакыв видлалан тэчас.....	119
6 индӧд. Кывберд видлалан тэчас .....	120
7 индӧд. Морта нимвежтас видлалан тэчас.....	120
8 индӧд. Кызди уджавны изложение вылын .....	121
9 индӧд. Кызди уджавны проект вылын.....	121
10 индӧд. Вежлӧгъяс, на дорӧ юалӧмъяс .....	122
 Вежӧртас гӧгӧрвоӧдан кывкуд .....	123

Полякова Э.И., Прокушева Т.И.  
П 54 Коми кыв: Нельёд класслы велӧдчан небӧг. –  
Сыктывкар: ООО «Анбур», 2010. – 128 л.б.

ISBN 978-5-91669-029-3

ББК 81.2 Коми

---

Рекомендовано  
Министерством образования Республики Коми

Учебное издание

ПОЛЯКОВА ЭЛЬВИРА ИВАНОВНА  
ПРОКУШЕВА ТАМАРА ИВАНОВНА

**КОМИ ЯЗЫК**

**Учебник для 4 класса**

На коми языке

Художники: Г.Н. Шарипков, И.А. Авилова

Редактор В.И. Трошева  
Компьютерная верстка – С.И. Оверин

Подписано к печати 07.07.10. Формат 70х90 $\frac{1}{16}$ . Бумага офсетная  
Печать офсетная. Усл. печ. л. 9,36. Уч.-изд.л. 7,9  
Тираж 700. Заказ № 4315

ООО «Анбур». 167982, г. Сыктывкар, ул. К.Маркса, 229

Отпечатано с готового оригинал-макета в полном соответствии с качеством  
предоставленных материалов в ООО «Коми республиканская типография»  
167982, г. Сыктывкар, ул. В.Савина, 81. Тел. (8212) 28-46-71, 28-46-81

ISBN 978-5-91669-029-3



9 785916 690293